

Inches

1 2 3 4 5 6 7 8 9 10 11 12 13 14 15 16 17 18 19 8

Centimetres

TIFFEN® Color Control Patches

© The Tiffen Company, 2007

Blue

Cyan

Green

Yellow


Red

Magenta

White

3/Color

Black





南齊書


序目

卷一之八

涵芬樓  
影印



南齊書五  
十九卷



南齊書序  
歲次丙辰

涵芬樓印

南齊書序


南齊書八紀十一志四十列傳合五十九篇梁蕭子顯  
撰始江淹已爲十志沈約又爲齊紀而子顯自表武帝  
別爲此書臣等因校正其訛謬而敘其篇目曰將以是  
非得失興壞理亂之故而爲法戒則必得其所託而後  
能傳於久此史之所以作也然而所託不得其人則或  
失其意或亂其實或析理之不通或設辭之不善故雖  
有殊功遯德非常之迹將聞而不章鬱而不發而禱杌  
鬼瑣姦回凶慝之形可幸而掩也嘗試論之古之所謂  
良史者其明必足以周萬事之理其道必足以適天下


之用其智必足以通難知之意其文必足以發難顯之情然後其任可得而稱也何以知其然邪昔者唐虞有神明之性有微妙之德使曲之者不能知知之者不能名以爲治天下之本號令之所布法度之所設其言至約其體至備以爲治天下之具而爲二典者推而明之所記者豈獨其迹邪并與其深微之意而傳之小大精粗無不盡也本末先後無不白也使誦其說者如出乎其時求其指者如卽乎其人是不謂明足以周萬事之理道足以適天下之用智足以通難知之意文足以發難顯之情者乎則方是之時豈特任政者皆天下之

士哉蓋執簡操筆而隨者亦皆聖人之徒也兩漢以來爲史者去之遠矣司馬遷從五帝三王旣歿數千載之後秦火之餘因散絕殘脫之經以及傳記百家之說區區掇拾以集著其善惡之迹興廢之端又創己意以爲本紀世家八書列傳之文斯亦可謂奇矣然而蔽害天下之聖法是非顛倒而采摭謬亂者亦豈少哉是豈可不謂明不足以周萬事之理道不足以適天下之用智不足以通難知之意文不足以發難顯之情者乎夫自三代以後爲史者如遷之文亦不可不謂雋偉拔出之材非常之士也然顧以謂明不足以周萬事之理道不

南齊書序  
足以適天下之用智不足以通難知之意文不足以發  
難顯之情者何哉蓋聖賢之高致遷固有不能純達其  
情而見之於後者矣故不得而與之也遷之得失如此  
況其他邪至於宋齊梁陳後魏後周之書蓋無以議爲  
也子顯之於斯文喜自馳騁其更改破析刻彫藻績之  
變尤多而其文益下豈夫材固不可以強而有邪數世  
之史旣然故其事迹曖昧雖有隨世以就功名之君相  
與合謀之臣未有赫然得傾動天下之耳目播天下之  
口者也而一時偷奪傾危悖理反義之人亦幸而不暴  
著於世豈非所託不得其人故邪可不惜哉蓋史者所

以明夫治天下之道也故爲之者亦必天下之材然後  
其任可得而稱也豈可忽哉豈可忽哉臣恂臣寶臣臣  
穆臣藻臣洙臣覺臣彥若臣鞏謹敘目錄昧死上





南齊書目錄

南齊書目錄

梁

蕭

子

顯

撰

凡五十九卷

本紀八卷

志一十一卷

列傳四十卷

南齊書卷一

本紀第一

高帝上

姓蕭氏諱道成

南齊書卷二

乾隆四年校刊

南齊書目錄

一

本紀第二

高帝下

南齊書卷三

本紀第三

武帝 諱贛

南齊書卷四

本紀第四

鬱林王 諱昭業

南齊書卷五

本紀第五

海陵王 諱昭文

南齊書卷六

本紀第六

明帝 諱鸞

南齊書卷七

本紀第七

東昏侯 諱寶卷

南齊書卷八

本紀第八

南齊書卷九 和帝 諱融

乾隆四年校刊

南齊書目錄

二

南齊書卷九

志第一

禮上

南齊書卷十

志第二

禮下

南齊書卷十一

志第三

樂

南齊書卷十二

志第四

天文上

南齊書卷十三

志第五

天文下

南齊書卷十四

志第六

志州郡上

南齊書卷十五

志第七

州郡下

南齊書卷十六

志第八

百官

南齊書卷十七

志第九

輿服

南齊書卷十八

志第十

祥瑞

南齊書卷十九

志第十一

五行

南齊書卷二十

列傳第一

皇后

宣孝陳皇后

武穆裴皇后

鬱林王何妃

明敬劉皇后

高昭劉皇后

文安王皇后

海陵王王妃

東昏褚皇后

和帝王皇后

南齊書卷二十一

列傳第二

文惠太子

南齊書卷二十二

列傳第三

豫章文獻王嶷

南齊書卷二十三

列傳第四

褚淵淵弟澄  
徐嗣

王儉

南齊書卷二十四

列傳第五

柳世隆

張瓌

南齊書卷二十五

列傳第六

垣崇祖

張敬兒

南齊書卷二十六

列傳第七

王敬則

陳顯達

南齊書卷二十七

列傳第八

劉懷珍

李安民

王玄載

弟玄邈

南齊書卷二十八

列傳第九

崔祖思

劉善明

蘇侃

垣榮祖

南齊書卷二十九

列傳第十

呂安國

全景文

周山圖

周盤龍

王廣之

南齊書卷三十

列傳第十一

薛淵

戴僧靜

栢康

焦度

曹虎

南齊書卷三十一

列傳第十二

江謐

荀伯玉

南齊書卷三十二

乾隆四年校刊

南齊書目錄

六

南齊書目錄

五

列傳第十三

王琨

張岱

褚炫

何戢

王延之

阮韜

南齊書卷三十三

列傳第十四

王僧虔

張緒

南齊書卷三十四

列傳第十五

虞玩之

劉休

沈冲

庾杲之

南齊書王謙十八

南齊書卷三十五

列傳第十六

高祖十二王

臨川獻王映

長沙威王晃

武臨昭王暉

安成恭王暕

鄱陽王鏘

桂陽王鐸

南齊書始興簡王鑑

江夏王鋒

南平王銳

宜都王鐸

晉熙王錄

河東王鉉

南齊書卷三十六

列傳第十七

謝超宗

劉詳

南齊書卷三十七

列傳第十八

到撝

劉俊

南齊書卷三十八

列傳第十九

胡諧之

南齊書卷三十九

蕭景先

蕭赤谷

子穎胄

南齊書卷四十

列傳第二十

劉瓛

弟瓛

陸澄

南齊書卷四十一

列傳第二十一

武帝十七王

竟陵文宣王子良

子昭胄

廬陵王子卿

魚復侯子響

安陸王子敬

晉安王子懋

隨郡王子隆

建安王子真

西陽王子明

南海王子罕

巴陵王子倫

邵陵王子貞

臨賀王子岳

西陽王子文

衡陽王子峻

南康王子琳

湘東王子建

南郡王子夏

南齊書卷四十一

列傳第二十二

張融

周顥

南齊書卷四十二

列傳第二十三

王晏

蕭湛

蕭坦之

江祐

南齊書卷四十三

列傳第二十四

江敷

何昌寓

謝瀹

王思遠

南齊書卷四十四

列傳第二十五

徐孝嗣

沈文季

南齊書卷四十五

列傳第二十六

宗室

衡陽元王道度

始安貞王道生

遙光  
遙昌

遙欣

安陸昭王緬

南齊書卷四十六

列傳第二十七

王秀之

王慈

蔡約

陸慧曉

顧憲之

蕭惠基

南齊書卷四十七

列傳第二十八

王融

謝朓

南齊書卷四十八

列傳第二十九

袁彖

孔稚珪

劉繪

南齊書卷四十九

列傳第三十

王奐 從弟續

張沖

南齊書卷五十

列傳第三十一

文二王

巴陵王昭秀

桂陽王昭粲

明七王

巴陵隱王寶義

江夏王寶玄

廬陵王寶源

鄱陽王寶寅

邵陵王寶攸

晉熙王寶嵩

桂陽王寶貞

南齊書卷五十一

列傳第三十二

裴叔業

崔慧景

張欣泰

南齊書卷五十二

列傳第三十三

文學

丘靈鞠

檀超

卞彬

丘巨源

王智深

陸厥

崔慰祖

王遠之

祖冲之

賈淵

南齊書卷五十三

列傳第三十四

良政

傅琰

虞愿

劉懷慰

裴昭明

沈憲

李珪之

孔琇之

南齊書卷五十四

列傳第三十五

高逸

褚伯玉

明僧紹

顧歡

臧榮緒

何求

劉蚪

庾易

宗測

杜京產

沈麟士

吳苞

徐伯珍

南齊書卷五十五

列傳第三十六

孝義

崔懷慎

公孫僧遠

吳欣之

韓孫伯

孫淡

華寶

韓靈敏

封延伯

吳達之

王文殊

朱謙之

蕭叡明

樂頤

江泌

高杜栖

陸絳

南齊書卷五十六

列傳第三十七

倖臣

紀僧真

劉係宗

茹法亮

呂文顯

呂文度

南齊書卷五十七

列傳第三十八

魏虜

南齊書卷五十八

列傳第三十九

蠻

東南夷

南齊書卷五十九

列傳第四十

芮芮虜

河南氏羗

南齊書目錄

南齊書卷一

梁

蕭

子

顯

撰

本紀第一

高帝上

太祖高皇帝諱道成字紹伯姓蕭氏小諱鬪將漢相國  
 蕭何二十四世孫也何子鄼定侯延生侍中彪彪生公  
 府掾章章生皓皓生仰仰生御史大夫望之望之生光  
 祿大夫育育生御史中丞紹紹生光祿勳閎閎生濟陰  
 太守闡闡生吳郡太守永生生中山相苞苞生博士周  
 周生蛇丘長矯矯生州從事逵逵生孝廉休休生廣陵

府丞豹豹生太中大夫裔裔生淮陰令整整生卽丘令  
僑僑生輔國參軍樂子宋昇明二年九月贈太常生皇  
考蕭何居沛侍中彪免官居東海蘭陵縣中都鄉中都  
里晉元康元年分東海爲蘭陵郡中朝亂淮陰令整字  
公齊過江居晉陵武進縣之東城里寓居江左者皆僑  
置本土加以南名於是爲南蘭陵蘭陵人也皇考諱承  
之字嗣伯少有大志才力過人宗人丹陽尹摹之北兗  
州刺史源之竝見知重初爲建威府參軍義熙中蜀賊  
譙縱初平皇考遷揚武將軍安固汶山二郡太守善於  
綏撫元嘉初徙爲武烈將軍濟南太守七年右將軍到

彥之北伐大敗虜乘勝破青部諸郡國別帥安平公乙  
旃眷寇濟南皇考率數百人拒戰退之虜衆大集皇考  
使偃兵開城門衆諫曰賊衆我寡何輕敵之甚皇考曰  
今日懸守窮城事已危急若復示弱必爲所屠惟當見  
疆待之耳虜疑有伏兵遂引去青州刺史蕭思話欲委  
鎮保險皇考固諫不從思話失據潰走明年征南大將  
軍檀道濟於壽張轉戰班師滑臺陷沒兗州刺史竺靈  
秀抵罪宋文帝以皇考有全城之功手書與都督長沙  
王義欣曰承之理民直亦不在武幹後今擬爲兗州刺  
史檀征南詳之皇考與道濟無素故事遂寢遷輔國鎮

北中兵參軍員外郎十年蕭思話爲梁州刺史皇考爲其橫野府司馬漢中太守氐帥楊難當寇漢川梁州刺史甄法護棄城走思話至襄陽不進皇考輕軍前行攻氐僞魏興太守薛健於黃金山尅之黃金山張魯舊戍南接漢川北枕驛道險固之極健旣潰散皇考卽據之氐僞梁秦二州刺史趙溫先據州城聞皇考至退據小城薛健退屯下桃城立柴營皇考引軍與對壘相去二里健與僞馮翊太守蒲早子悉力出戰皇考大破之健等閉營自守不敢出思話繼至賊乃稍退皇考進至峨公山爲左衛將軍沙州刺史呂平大衆所圍積日建武

將軍蕭汪之平西督護段蚪等至表裏奮擊大破之難當又遣息和領步騎萬餘人夾漢水兩岸援趙溫攻逼皇考相拒四十餘日賊皆衣犀甲刀箭不能傷皇考命軍中斷槩長數尺以大斧搥其後賊不能當乃焚營退皇考追至南城衆軍自後而進連戰皆捷梁州平詔曰承之稟命先驅蒙險深入全軍屢尅奮其忠果可龍驤將軍隨府轉寧朔司馬太守如故入爲太子屯騎校尉文帝以平氐之勞青州缺將欲授用彭城王義康秉政皇考不附乃轉爲江夏王司徒中兵參軍龍驤將軍南泰山太守封晉興縣五等男邑三百四十戶遷右軍將

軍元嘉二十四年殂年六十四梁士民思之於峨公山立廟祭祀昇明二年贈散騎常侍金紫光祿大夫太祖以元嘉四年丁卯歲生姿表英異龍顏鍾聲鱗文遍體儒士雷次宗立學於雞籠山太祖年十三受業治禮及左氏春秋十七年宋大將軍彭城王義康被黜鎮豫章皇考領兵防守太祖舍業南行十九年竟陵蠻動文帝遣太祖領偏軍討沔北蠻二十一年伐索虜至丘檻山竝破走二十三年雍州刺史蕭思話鎮襄陽啓太祖自隨戍沔北討樊鄧諸山蠻破其聚落初爲左軍中兵參軍二十七年索虜圍汝南戍主陳憲臺遣寧朔將軍臧

質安蠻司馬劉康祖救之文帝使太祖宣旨授節度聞虜主拓跋燾向彭城質等回軍救援至盱眙太祖與質別軍主胡宗之等五軍步騎數千人前驅燾已潛過淮卒相遇於莞山下合戰敗績緣淮奔退宗之等皆陷沒太祖還就質固守爲虜所攻圍甚危急事寧還京師二十九年領偏軍征仇池梁州西界舊有武興戍晉隆安中沒屬氐武興西北有蘭臯戍去仇池二百里太祖擊二壘皆破之遂從谷口入關未至長安八十里梁州刺史劉秀之遣司馬馬注助太祖攻談堤城拔之虜僞河間公奔走虜救兵至太祖軍力疲少又聞文帝崩乃燒

城還南鄭襲爵晉興縣五等男孝建初除江夏王大司馬參軍隨府轉太宰遷員外郎直閣中書舍人西陵王撫車參軍建康令新安王子鸞有盛寵簡選僚佐爲北軍中郎中兵參軍陳太后憂起爲武烈將軍復爲建康令中兵如故景和世除後軍將軍值明帝立爲右軍將軍時四方反叛會稽太守尋陽王子房及東諸郡皆起兵明帝加太祖輔國將軍率衆東討至晉陵與賊前鋒將程桿孫曇躍等戰一日破賊十二壘分軍定諸縣晉陵太守袁標棄城走東境諸城相繼奔散徐州刺史薛安都反彭城從子索兒寇淮陰山陽太守程天祚舉城

叛徐州刺史申令孫又降徵太祖討之時太祖平東賊還又將南討出次新亭前軍已發而索兒自睢陵渡淮馬步萬餘人擊殺臺軍主孫耿縱兵逼前軍張永營告急明帝聞賊渡遠追太祖往救之屯破釜索兒向鍾離永遣寧朔將軍王寬據盱眙遏其歸路索兒擊破臺軍主高道慶走之於石鼈將西歸王寬與軍主任農夫先據白鵠澗張永遣太祖馳督寬索兒東要擊太祖使不得前太祖鼓行結陣直入寬壘索兒望見不敢發經數日索兒引軍頓石梁太祖追之至葛冢候騎還云賊至太祖乃頓軍引管分兩馬軍夾營外以待之俄頃賊馬

步奄至又推火車數道攻戰相持移日乃出輕兵攻賊西使馬軍合擊其後賊衆大敗追奔獲其器仗進屯石梁澗北索兒夜遣千人來斫營營中驚太祖臥不起宣令左右案部不得動須臾賊散太祖議欲於石梁西南高地築壘通南道斷賊走路索兒果來爭之太祖率軍擊破之賊馬自相踐藉死索兒走向鍾離太祖追至黠黠而還除驍騎將軍封西陽縣侯邑六百戶遷巴陵王衛軍司馬隨鎮會稽江州刺史晉安王子勛遣臨川內史張淹自鄱陽嶠道入三吳臺軍主沈思仁與僞龍驤將軍任皇鎮西參軍劉越緒各據險相守明帝遣太祖領三千人討之時朝廷器甲皆充南討太祖軍容寡闕乃編櫟皮爲馬具裝析竹爲寄生夜舉火進軍賊望見恐懼未戰而走還除桂陽王征北司馬南東海太守行南徐州事初明帝遣張永沈攸之以衆喻降薛安都謂太祖曰吾今因此北討卿意以爲何如太祖對曰安都才識不足狡猾有餘若長轡緩御則必遣子入朝今以兵逼之彼將懼而爲計恐非國之利也帝曰衆軍猛銳何往不剋卿每杖策幸勿多言安都見兵至果引索虜永等敗於彭城淮南孤弱以太祖爲假冠軍將軍持節都督北討前鋒諸軍事鎮淮陰泰始三年沈攸之吳喜

北敗於睢口諸城戍大小悉奔歸虜遂退至淮北圍角  
城戍主賈法度力弱不敵諸將勸太祖渡岸救之太祖  
不許遣軍主高道慶將數百張弩浮艦淮中遙射城外  
虜弩一發數百箭俱去虜騎相引避之乃命進戰城圍  
卽解遷督南兗徐二州諸軍事南兗州刺史持節假冠  
軍督北討如故五年進督兗青冀三州六年除黃門侍  
郎領越騎校尉不拜復授冠軍將軍留本任明帝常嫌  
太祖非人臣相而民間流言云蕭道成當爲天子明帝  
愈以爲疑遣冠軍將軍吳喜以三千人北使令喜留軍  
破釜自持銀壺酒封賜太祖太祖戎衣出門迎卽酌飲  
之喜還帝意乃悅七年徵還京師部下勸勿就徵太祖  
曰諸卿闇於見事主上自誅諸弟爲太子稚弱作萬歲  
後計何關佗族惟應速發事緩必見疑今骨肉相害自  
非靈長之運禍難將與方與卿等戮力耳拜散騎常侍  
太子左衛率時世祖以功當別封贛縣太祖以一門二  
封固辭不受詔許之食邑二百戶明帝崩遺詔爲右衛  
將軍領衛尉加兵五百人與尚書令袁粲護軍褚淵領  
軍劉劭共掌機事又別領東北選事尋解衛尉加侍中  
領石頭戍軍事明帝誅戮蕃戚江州刺史桂陽王休範  
以人凡獲全及蒼梧王立更有窺伺覬望密與左右闔

人於後堂習馳馬招聚士衆元徽二年五月舉兵於尋陽收畧官民數日得士衆二萬人騎五百匹發盆口悉乘商旅船艦大雷戍主杜道欣鵲頭戍主劉魯期告變朝廷惶駭太祖與護軍褚淵征北張永領軍劉劭僕射劉秉遊擊將軍戴明寶驍騎將軍阮佃夫右軍將軍王道隆中書舍人孫千齡員外郎楊運長集中書省計議莫有言者太祖曰昔上流謀逆皆因淹緩至於覆敗休範必遠懲前失輕兵急下乘我無備今應變之術不宜念遠若偏師失律則大沮衆心宜頓新亭白下堅守宮掖東府石頭以待賊千里孤軍後無委積求戰不得自然瓦解我請頓新亭以當其鋒征北可以見甲守白下中堂舊是置兵地領軍宜屯宣陽門爲諸軍節度諸貴安坐殿中右軍諸人不須競出我自前驅破賊必矣因索筆下議竝注同中書舍人孫千齡與休範有密契獨曰宜依舊遣軍據梁山魯顯開右衛若不出白下則應進頓南州太祖正色曰賊今已近梁山豈可得至新亭既是兵衝所以欲死報國耳常曰乃可屈曲相從今不得也座起太祖顧謂劉劭曰領軍已同鄙議不可改易乃單車白服出新亭加太祖使持節都督征討諸軍平南將軍加鼓吹一部治新亭城壘未畢賊前軍已至太

祖方解衣高臥以安衆心乃索白虎幡登西垣使寧朔將軍高道慶羽林監陳顯達員外郎王敬則浮舸與賊水戰自新林至赤岸大破之燒其船艦死傷甚衆賊步上新林太祖馳使報劉劭急開大小桁撥淮中船舫悉渡北岸休範乘肩輿率衆至壘南上遣寧朔將軍黃回馬軍主周盤龍將步騎出壘對陣休範分兵攻壘東短兵接戰自己至午衆皆失色太祖曰賊雖多而亂尋破也楊運長領三齊射手七百人引彊命中故賊不得逼城未時張敬兒斬休範首太祖遣隊主陳靈寶送首還臺靈寶路中遇賊軍埋首道側臺軍不見休範首愈疑懼賊衆亦不知休範已死別率杜黑蠡急攻壘東司空主簿蕭惠朗數百人突入東門叫噪至堂下城上守門兵披退太祖挺身上馬率數百人出戰賊皆推楯而前相去數丈分兵橫射太祖引滿將發左右將戴仲緒舉楯扞之箭應手飲羽傷百餘人賊死戰不能當乃却衆軍復得保城與黑蠡拒戰自晡達明旦矢石不息其夜大雨鼓叫不復相聞將士積日不得寢食軍中馬夜驚城內亂走太祖秉燭正坐厲聲呵止之如此者數四賊帥丁文豪設伏破臺軍於阜茨橋直至朱雀桁劉劭欲開桁王道隆不從劭及道隆竝戰沒初劭高尚其意託

造園宅名爲東山頗忽世務太祖謂之曰將軍以顧命之重任兼內外主上春秋未幾諸王竝幼冲上流聲議遐邇所聞此是將軍艱難之日而將軍深尚從容廢省羽翼一朝事至雖悔何追勗竟不納賊進至杜姥宅車騎典籤茅恬開東府納賊冠軍將軍沈懷明於石頭奔散張永潰於白下宮內傳新亭亦陷太后執蒼梧王手泣曰天下敗矣太祖遣軍生陳顯達任農夫張敬兒周盤龍等從石頭濟淮間道從承明門入衛宮闕休範旣死典籤許公與詐稱休範在新亭士庶惶惑詣壘投名者千數太祖隨得輒燒之乃列兵登城北謂曰劉休範

父子先昨皆已卽戮屍在南崗下身是蕭平南諸君善見觀君等名皆已焚除勿有懼也臺分遣衆軍擊杜姥宅宣陽門諸賊皆破平之太祖振旅凱入百姓緣道聚觀曰全國家者此公也太祖與袁粲褚淵劉秉引咎解職不許遷散騎常侍中領軍都督南兗徐兗青冀五州軍事鎮軍將軍南兗州刺史持節如故進爵爲公增邑二千戶太祖欲分其功請益粲等戶更日入直決事號爲四貴秦時有太后穰侯涇陽高陵君稱爲四貴至是乃復有焉四年加太祖尚書左僕射本官如故休範平後蒼梧王漸行凶暴南徐州刺史建平王景素少有令

譽朝野歸心景素亦潛爲自全之計布款誠於太祖太祖拒而不納七月羽林監袁祇奔景素便舉兵太祖出屯玄武湖遣衆軍北討事平乃還太祖威名旣重蒼梧王深相猜忌幾加大禍陳太妃罵之曰蕭道成有功於國今若害之後誰復爲汝著力者乃止太祖密謀廢立五年七月戊子帝微行出北湖常單馬先走羽儀禁衛隨後追之於堤塘相蹈藉左右張互兒馬墜湖帝怒取馬置光明亭前自馳騎刺殺之因共屠割與左右作羌胡伎爲樂又於蠻岡賭跳際夕乃還仁壽殿東阿氈屋中寢語左右楊玉夫伺織女度報我時殺害無常人懷危懼玉夫與其黨陳奉伯等二十五人同謀於氈屋中取千牛刀殺蒼梧王稱敕使廂下奏伎因將首出與王敬則敬則送太祖太祖夜從承明門乘常所騎赤馬入殿內驚怖旣知蒼梧王死咸稱萬歲及太祖踐阼號此馬爲龍驤將軍世謂爲龍驤赤明日太祖戎服出殿庭槐樹下召四貴集議太祖謂劉秉曰丹陽國家重戚今日之事屬有所歸秉讓不當太祖次讓袁粲粲又不受太祖乃下議備法駕詣東城迎立順帝於是長刀遮粲秉等各失色而去甲午太祖移鎮東府與袁粲褚淵劉秉各甲仗五十人入殿丙申進位侍中司空錄尚書事

驃騎大將軍持節都督刺史如故封竟陵郡公邑五千戶給油幢絡車班劍三十人太祖固辭上命卽驃騎大將軍開府儀同三司庚戌進督南徐州刺史封楊玉夫等二十五人爵邑各有差十月戊辰又進督豫司二州初荊州刺史沈攸之與太祖於景和世同直殿省申以歡好以長女義興公主妻攸之第三子元和攸之爲郢州值明帝晚運陰有異圖自郢州遷爲荊州聚斂兵力將吏逃亡輒討質隣伍養馬至二千餘匹皆分賦戍邏將士使耕田而食廩財悉充倉儲荊州作部歲送數千人仗攸之割留簿上供討四山蠻裝治戰艦數百千艘

沈之靈溪裏錢帛器械巨積朝廷畏之高道慶家在華容假還過江陵道慶素便馬攸之與宴飲於聽事前合馬槩道慶槩中破攸之馬鞍攸之怒索刃槩道慶馳馬而出還都說攸之反狀請三千人襲之朝議慮其事難濟太祖又保持不許太祖旣廢立遣攸之子司徒左長史元琰賫蒼梧王諸虐害器物示之攸之未得卽起兵乃上表稱慶并與太祖書推功攸之有素書十數行常韜在襦褠角云是明帝與已約誓十二月遂舉兵其妾崔氏許氏諫攸之曰官年已老那不爲百口計攸之指襦褠角示之稱太后令召已下都京師恐懼乙卯太祖

入居朝堂命諸將西討平西將軍黃回爲都督前驅前  
湘州刺史王蘊太后兄子少有膽力以父指名宦不達  
欲以將途自奮每撫刀曰龍淵太阿汝知我者叔父景  
文誠之曰阿答汝滅我門戶蘊曰答與童烏貴賤覺異  
童烏景文子絢小字答蘊小字也蘊遭母喪罷任還至  
巴陵停舟一月日與攸之密相交構時攸之未便舉兵  
蘊乃下達郢州世祖爲郢州長史蘊期世祖出弔因作  
亂據郢城世祖知之不出蘊還至東府前又期太祖出  
太祖又不出弔再計不行外謀愈固司徒袁粲尚書令  
劉秉見太祖威權稍盛慮不自安與蘊及黃回等相結  
舉事殿內宿衛主帥無不協同攸之反問初至太祖往  
石頭與粲謀議粲稱疾不相見剋壬申夜起兵據石頭  
劉秉恇怯晡時從丹陽郡載婦女入石頭朝廷不知也  
其夜丹陽丞王遜告變秉從弟領軍韞及直閣將軍卜  
伯興等嚴兵爲內應太祖命王敬則於宮內誅之遣諸  
將攻石頭王蘊將數百精手帶甲赴粲城門已閉官軍  
又至乃散衆軍攻石頭斬粲劉秉走雒檐湖蘊逃鬪場  
竝擒斬之粲位任雖重無經世之畧疎放好酒步履白  
揚郊野閒道遇一士大夫使呼與酣飲明日此人謂被  
知顧到門求通粲曰昨飲酒無偶聊相要耳竟不與相

見嘗作五言詩云訪迹雖中宇循寄乃滄州蓋其志也  
劉秉少以宗室清謹見知孝武世秉弟遐坐通嫡母殷  
氏養女殷舌中血出衆疑行毒害孝武使秉從弟祗諷  
秉啓證其事秉曰行路之人尚不應爾今日迺可一門  
同盡無容奉敕衆以此稱之故爲明帝所任蒼梧廢秉  
出集議於路逢弟韞韞開車迎問秉曰今日之事固當  
歸兄邪秉曰吾等已讓領軍矣韞樾胸曰君肉中詎有  
血祭典籤莫嗣祖知祭謀太祖召問嗣祖袁謀反何不  
啓聞嗣祖曰事主義無二心雖死不敢泄也蘊嬖人張  
承伯藏匿蘊太祖竝赦而用之黃回頓新亭聞石頭鼓  
噪率兵來赴之朱雀舫有戍軍受節度不聽夜過會石  
頭已平因稱救援太祖知而不言撫之愈厚遣回西上  
流涕告別太祖屯閩武堂馳結軍旅閏月辛丑詔假黃  
鉞率大衆出屯新亭中興堂治嚴築壘教曰河南稱慈  
諒由掩齒廣漢流仁實存殯朽近表製茲營崇溝浚塹  
古墟曩隧時有湮移深松茂草或致刊薙憑軒動懷巡  
隍增愴宜竝爲收改葬并設薄祀

二年正月沈攸之攻郢城不剋衆潰自經死傳首京邑  
丙子太祖旋鎮東府二月癸未進太祖太尉增封三千  
戶都督南徐南兗徐兗青冀司豫荆雍湘郢梁益廣越

十六州諸軍事太祖解驃騎辭都督不許乃表送黃鉞  
三月己酉增班劍爲四十人甲仗百人入殿丙子加羽  
葆鼓吹餘竝如故辛卯太祖誅鎮北將軍黃回大明泰  
始以來相承奢侈百姓成俗太祖輔政罷御府省二尚  
方諸飾玩至是又上表禁民間華僞雜物不得以金銀  
爲箔馬乘具不得金銀度不得織成繡裙道路不得著  
錦履不得用紅色爲幡蓋衣服不得翦綵帛爲雜花不  
得以綾作雜服飾不得作鹿行錦及局脚檉栢床牙箱  
籠雜物綵帛作屏鄣錦緣薦席不得私作器仗不得以  
七寶飾樂器又諸雜漆物不得以金銀爲花獸不得輒

鑄金銅爲像皆須墨敕凡十七條其中宮及諸王服用  
雖依舊例亦請詳衷九月丙午進位假黃鉞都督中外  
諸軍事太傅領揚州牧劍履上殿入朝不趨贊拜不名  
置左右長史司馬從事中郎掾屬各四人使持節太尉  
驃騎大將軍錄尚書南徐州刺史如故固辭詔遣敦勸  
乃受黃鉞辭殊禮甲寅給三望車

三年正月乙巳太祖表蠲百姓逋負丙辰加前部羽葆  
鼓吹丁巳命太傅府依舊辟召丁卯給太祖甲仗五百  
人出入殿省甲午重申前命劍履上殿入朝不趨贊拜  
不名三月甲辰詔進位相國總百揆封十郡爲齊公備

九錫之禮加璽紱遠遊冠位在諸侯王上加相國綠綬  
綬其驃騎大將軍揚州牧南徐州刺史如故太祖三讓  
公卿敦勸固請乃受甲寅策相國齊公曰天地變通莫  
大乎炎涼懸象著明莫崇乎日月嚴冬播氣貞松之操  
自高光景時昏若華之暎彌顯是故英睿當亂而不移  
忠賢臨危而盡節自景和昏虐玉綱弛紊太宗受命紹  
開中興運屬屯難四郊多壘蕭將軍震威華戎實資義  
烈康國濟民於是乎在朕以不造夙罹閔凶嗣君失德  
書契未紀威侮五行虔劉九縣神厭靈繹海水羣飛彝  
器已塵宗禋誰主綴旒之殆未足爲譬豈直小宛興刺

黍離作歌而已哉天贊皇宋實啓明宰爰登寡昧纂承  
大業鴻緒再維閔基重造高勲至德振古絕倫昔保衡  
翼殷博陸匡漢方斯茂如也今將授公典禮其敬聽朕  
命乃者袁劉構禍實繁有徒子房不臣稱兵協亂跨路  
五湖憑陵吳越浮祿虧辰沈氛晦景桴鼓振於王畿鋒  
鏑交乎天邑顧瞻宮掖將成茂草言念邦國翦爲仇讐  
當此之時人無固志公投袂殉難超然奮發執金板而  
先馳登寅車而戒路軍政端嚴卒乘輯睦麾鉞一臨凶  
黨冰泮此則霸業之基勤王之始也安都背叛竊據徐  
方敢率犬羊陵虐淮濟索兒愚悖同惡相濟天祚無象

背順歸逆北鄙黔黎奄墜塗炭均人廢職邊師告警公  
受命宗祊精貫朝日擁節和門氣踰霄漢破釜之捷斬  
馘蔽野石梁之戰禽其渠帥保境全民江陽卽序此又  
公之功也張淹迷昧弗顧本朝爰自南區志圖東夏潛  
軍閒入竊覬不虞于時江服未夷皇塗荐阻公忠誠慷  
慨在險彌亮深識九變妙察五色以寡制衆所向風偃  
朝廷無東顧之憂閩越有來蘇之慶此又公之功也匈  
奴野心侵掠疆場前師失律王旅崩撓灑血成川伏尸  
千里醜羯俯張勢振彭泗乘勝長驅窺覲京甸冠帶之  
軌將湮被髮之容行及公奉辭伐罪戒旦晨征兵車始  
交氛禔時蕩弔死撫傷弘宣皇澤俾我淮肥復沾盛化  
此又公之功也自茲厥後獫狁孔熾封豕長蛇重窺上  
國而世故相仍師出日老戰士無臨陣之心戎卒有懷  
歸之思是以下邳精甲望風振恐角城高壘指日淪陷  
公眷言王事發憤忘食躬擐甲胄視險若夷短兵纔接  
巨猾鳥散分疆畫界開創青兗此又公之功也泰始之  
末入參禁旅任兼軍國事同顧命桂陽負衆輕問九鼎  
裂冠毀冕拔本塞源入兵萬乘之國頓戟象魏之下烈  
火焚於王城飛矢集乎君屋機變儻忽終古莫二羣后  
憂惶元戎無主公按劔凝神則奇謀貫世秉旄指麾則

儒夫成勇曾不崇朝新亭獻捷信宿之間宣陽底定雲  
霧廓清區宇康乂此又公之功也皇室多難疊起戚藩  
邢晉應韓翻爲讐敵建平失圖興兵內侮公又指授六  
師義形乎色役未踰旬朱方寧晏此又公之功也蒼梧  
肆虐諸夏糜沸淫刑以逞誰則無罪火炎崑岡玉石俱  
焚黔首相悲朝不謀夕高祖之業已淪大明之軌誰嗣  
公遠稽殷漢之義近遵魏晉之典猥以眇身入奉宗祏  
七廟清謐九區反政此又公之功也袁粲無質劉秉攜  
貳韜述相扇成此亂階醜圖潛構危機竊發據有石頭  
志犯應路公神謀內運霜鋒外舉妖沴載澄國塗悅穆  
此又公之功也沈攸之苞禍歲月滋彰蜂目豺聲阻兵  
安忍哀彼荆漢獨爲匪民乃眷西顧緬同異域而經綸  
維始九伐未申長惡不悛遂逞凶逆驅合姦回勢過虢  
虎朝野憂疑三軍沮氣公秉鉞出關凝威江甸正情與  
曠日同亮明畧與秋雲競爽至義所感人百其心鼓鼓  
一麾夏首寧謐雲梯未舉魯山剋定積年逋誅一朝顯  
戮沮浦安流章臺順軌此又公之功也公有濟天下之  
勲重之以明哲道庇生民志匡宇宙戮力肆心劬勞王  
室自東徂西靡有寧晏險阻艱難備嘗之矣若乃締構  
宗稷之勤造物資始之澤雲布霧散光被六幽弼予一

人永清四海是以秬草騰芳於郊園景星垂暉於清漢  
遐方款關而慕義荒服重譯而來庭往哉邈乎無得而  
名焉朕聞疇庸表德前王盛典崇樹侯伯有國攸同所  
以文命成功玄珪顯錫姬旦秉哲曲阜啓蕃或改玉以  
弘風或胙土以宣化禮絕常班寵冠羣辟爰逮桓文車  
服異數惟公勲業超於先烈而褒賞闕於舊章古今之  
道何其爽歟靜言欽歎良有缺然今進授相國以青州  
之齊郡徐州之梁郡南徐州之蘭陵魯郡琅邪東海晉  
陵義興揚州之吳郡會稽凡十郡封公爲齊公錫茲玄  
土苴以白茅定爾邦家用建冢社斯實尚父故藩世作

盟主紀綱侯甸率由舊則往者周召建國師保兼任毛  
畢執珪入作卿士內外之寵同規在昔今命使持節兼  
太尉侍中中書監司空衛將軍雩都縣開國侯淵授公  
相國印綬齊公璽級持節兼司空守尚書令僧虔授齊  
公茅土金虎符第一至第五左竹使符第一至第十左  
相國位總百辟秩踰三事職以禮移號隨事革其以相  
國總百揆去錄尚書之稱送所假節侍中貂蟬中外都  
督太傅太尉印綬竟陵公印策其驃騎大將軍揚州牧  
南徐州刺史如故又加公九錫其敬聽後命以公執禮  
弘律儀刑區宇遐邇一體人無異業是用錫公大輅戎

輅各一玄牡二駟公崇脩南畝所寶惟穀王府充實百姓繁衍是用錫公衮冕之服赤舄副焉公居身以謙導物以義鎔鈞庶品罔不和悅是用錫公軒縣之樂六佾之儷公翼贊王猷聲教遠洽蠻夷竭歡回首內附是用錫公朱戶以居公明鑒人倫澄辨涇渭官方與能英乂克舉是用錫公納陛以登公保佑皇朝厲身化下杜漸防萌含生夤式是用錫公虎賁之士三百人公禦宄以刑禦姦以德君親無將將而必誅是用錫公鈇鉞各一公鳳舉四維龍騫八表威靈所振異域同文是用錫公彤弓一彤矢百旅弓十旅矢千公明發載懷肅恭禋祀

孝敬之重義感靈祇是用錫公秬鬯一卣珪瓚副焉齊國置丞相以下一遵舊式往欽哉其祇服朕命經緯乾坤宏亮洪業茂昭爾大德闡揚我高祖之休命太祖三讓公卿敦勸固請乃受之丁巳下令赦國內殊死以下今月十五日昧爽以前一皆原赦鰥寡孤獨不能自存者賜穀五斛府州所領亦同蕩然宋帝詔齊公十郡之外隨宜除用以齊國初建給錢五百萬布五千匹絹五千匹四月癸酉詔進齊公爵爲王以豫州之南梁陳郡潁川陳留南兗州之盱眙山陽秦郡廣陵海陵南沛十郡增封使持節司空衛將軍褚淵奉策綬璽紱金虎符

第一至第五左竹使符第一至第十左錫茲玄土苴白  
茅改立王社相國揚州牧驃騎大將軍南徐州刺史如  
故丙戌命齊王冕十有二旒建天子旌旗出警入蹕乘  
金根車駕六馬備五時副車置旄頭雲罕樂舞八佾設  
鍾虞宮縣王世子爲太子王女王孫爵命一如舊儀辛  
卯宋帝禪位下詔曰惟德動天玉衡所以載序窮神知  
化億兆所以歸心用能經緯乾坤彌綸宇宙闡揚鴻烈  
大庇生民晦往明來積代同軌前王踵武世必由之宋  
德湮微昏毀相襲景和騁悖於前元徽肆虐於後三光  
再霾七廟將墜璇極委馭含識知泯我文武之祚眇焉

如綴靜惟此紊夕惕疚心相國齊王天誕獻聖河嶽炳  
靈拯傾提危澄氛靜亂匡濟艱難功均造物宏謀霜照  
祕算雲回旌旆所臨一麾必捷英風所拂無思不偃表  
裏清夷遐邇寧謐旣而光啓憲章弘宣禮教姦宄之類  
覩隆威而隔情慕善之儔仰徽猷而增厲道邁於重華  
勲超乎文命蕩蕩乎無得而稱焉是以辮髮左衽之酋  
款關請吏木衣卉服之長航海來庭豈惟肅慎獻桔越  
裳薦黿而已哉故四輿載宅太府克和川陸効珍禎祥  
鱗集卿煙玉露旦夕揚藻嘉穉芝英晷刻呈茂革運斯  
炳代終彌亮負展握樞允歸明哲固以獄訟去宋謳歌

適齊昔金政旣淪水德締構天之歷數皎焉攸徵朕雖寡昧闇于大道稽覽隆替爲日已久敢忘列代遺則人神至願乎便遜位別宮敬禪于齊一依唐虞魏晉故事是日宋帝遜于東邸備羽儀乘畫輪車出東掖門問今日何不奏鼓吹左右莫有答者壬辰策命齊王曰伊太古初陳萬物紛綸開耀靈以鑑品物立元后以馭蒸人若夫容成大庭之世宓羲五龍之辰靡得而詳焉自軒黃以降墳索所紀畧可言者莫崇乎堯舜披金繩而握天鏡開玉匣而總地維德之休明宸居靈極期運有終歸禪與能所以大唐遜位謗然興歌有虞揖讓卿雲發采亮符命之攸臻坦至公以成務懷生載懌靈祇効祉遺風餘烈光被無垠漢魏因循弗敢失墜爰逮晉氏亦遵前儀惟我祖宗英叡勳格幽顯從天人而齊七政凝至德而撫四維末葉不造仍世多故日蝕星隕山淪川竭惟王聖哲淵明榮鏡寓宙體望日之威資就雲之澤臨下以簡御衆以寬仁育羣生義征不諛國塗荐阻弘五慮而又寧皇緒將湮秉六術以匡濟及至權臣內侮蕃屏陵上兵革雲翔萬邦震駭裁之以武風綏之以文化遐邇清夷表裏肅穆戢琕戈而事黼黻委旌門而恭儒館聲化遠洎荒服無塵殊類同規華戎一揆是以五

光來儀於軒庭九穗含芳於郊牧象緯昭澈布新之符  
已顯圖讖彪炳受終之義旣彰靈祇乃眷兆民引領朕  
聞至道深微惟人是弘天命無常惟德是與所以仰鑒  
玄情俯察羣望敬禪神器授帝位于爾躬四海困窮天  
祿永終於戲王其允執厥中儀刑前式以副率土之欣  
望命司裘而謁蒼昊奏雲門而升圜丘時膺大禮永保  
洪業豈不盛歟再命璽書曰皇帝敬問相國齊王大道  
之行與三代之英朕雖闇昧而有志焉夫昏明相襲晷  
景之恒度春秋遞運時歲之常序求諸天數猶且隆替  
矧伊在人能無終謝是故勛華弘風於上葉漢魏垂式

於後昆昔我高祖欽明文思振民育德皇靈眷命奄有  
四海晚世多難姦宄實繁鼓鼓宵聞元戎旦警億兆夷  
人啓處靡厝加以嗣君荒怠敷虐萬方神鼎將遷寶策  
無主實賴英聖匡濟艱危惟王體天則地含弘光大明  
竝日月惠均雲雨國步斯梗則稜威外發王猷不造則  
淵謨內昭重構闔吳再寧淮濟靜九江之洪波卷海沂  
之氛沴放斥凶昧存我宗祀舊物惟新三光改照逮至  
寵臣裂冠則裁以廟畧荆漢反噬則震以雷霆靡旃所  
臨風行草靡神算所指龍舉雲屬諸夏廓清戎翟思躋  
與文偃武闡揚洪烈明保冲昧翱翔禮樂之場撫柔黔

首咸濟仁壽之域自霜露所墜星辰所經正朔不通人  
跡罕至者莫不踰山越海北面稱蕃款關重譯脩其職  
貢是以禎祥發采左史載其奇立象垂文保章審其度  
鳳書表肆類之運龍圖顯班瑞之期重以珠衡日角神  
姿特挺君人之義在事必彰書不云乎皇天無親惟德  
是輔民心無常惟惠之懷神祇之眷如彼蒼生之願如  
此笙管變聲鍾石改調朕所以擁璇持衡傾佇明哲昔  
金德既淪而傳祚于我有宋歷數告終實在茲日亦以  
水德而傳于齊式遵前典廣詢羣議王公卿士咸曰惟  
宜今遣使持節兼太保侍中中書監司空衛將軍雩都  
縣侯淵兼太尉守尚書令僧虔奉皇帝璽綬受終之禮  
一依唐虞故事王其允副幽明時登元后寵綏八表以  
酬昊天之休命太祖三辭宋帝王公以下固請兼太史  
令將作匠陳文建奏符命曰六亢位也後漢自建武至  
建安三十五年一百九十六年而禪魏魏自黃初至咸  
熙二年四十六年而禪晉晉自太始至元熙二年一百  
五十六年而禪宋宋自永初元年至昇明三年凡六十  
年咸以六終六受六亢位也驗往揆今若斯昭著敢以  
職任備陳管穴伏願順天時應符瑞二朝百辟又固請  
尚書右僕射王儉奏被宋詔遜位臣等叅議宜剋日與

駕受禪撰立儀注太祖乃許焉

史臣曰案太乙九宮占推漢高五年太乙在四宮主人與客俱得吉計先舉事者勝是歲高祖破楚晉元興二年太乙在七宮太乙爲帝天目爲輔佐迫脅太乙是年安帝爲桓玄所逼出宮大將在一宮參相在三宮格太乙一經言格者已立政事上下格之不利有爲安居之世不利舉動元興三年太乙在七宮宋武破桓玄元嘉元年太乙在六宮不利有爲徐傅廢營陽王七年太乙在八宮關四惡歲大小將皆不得立其年到彥之北伐初勝後敗客主俱不利十八年太乙在二宮客主俱不利

是歲氏楊難當寇梁益來年仇池破十九年大小將皆見關不立凶其年裴方明伐仇池剋百頃明年失之泰始元年太乙在二宮爲大小將奄擊之其年景和廢二年太乙在三宮不利先起主人勝其年晉安王子勛反元徽二年太乙在六宮先起敗是歲桂陽王休範反竝伏誅四年太乙在七宮先起者客西北走其年建平王景素敗昇明元年太乙在七宮不利爲客安居之世舉事爲主人應發爲客袁粲沈攸之等反伏誅是歲太乙在杜門臨八宮宋帝禪位不利爲客安居之世舉事爲主人禪代之應也

王人顯於之親也  
 拜門顯入宮來而顯世  
 事欲生人熟德  
 景素娘長也  
 封爵顯平太  
 元壽二年太  
 李太守齊三  
 敬元平太一  
 具購平立西  
 南齊書卷一

南齊書卷一 一考證

高帝本紀上漢相國蕭何二十四世孫也○臣宗萬按

通鑑考異曰自相國何至皇考一十餘世皆有名及

官位蓋史官附會又按漢蕭望之傳不叙世譜此以

為何後恐未確當然傳云望之東海蘭陵人即此可

知帝之苗裔亦未必皆妄矣

闡生吳郡太守永○臣承蒼按齊梁同祖梁本紀作吳

郡太守冰未知孰是

令喜留軍破釜自持銀壺酒封賜太祖太祖戎衣出門

迎即酌飲之喜還帝意乃悅○臣祖庚按宋畧云道

成懼弗肯飲喜語以情先爲之酌於是喜得罪而道  
成被徵通鑑從之考異曰南齊書欲成太祖之美故  
云爾斯言信然

靈寶路中遇賊軍埋首道側○臣祖庚按宋畧云棄諸

溝中宋書云棄首於水三書互異通鑑從宋書

丁文豪設伏破臺軍於皂莢橋直至朱雀桁○臣祖庚

按通鑑注云皂莢橋當在新亭之北朱雀桁卽大航  
也以其在朱雀門外故名又云跨秦淮南北岸以渡  
行人大路所由也桁與航同

車騎典籤○臣祖庚按南史故事府州縣內論事皆籤

前直敘所論之事後云謹籤日月下又云某官某籤  
故府州置典籤以領之本五品吏宋初改爲士職宋  
末多以幼少皇子爲藩鎮以左右親近領典籤權任  
遂重

又於蠻岡賭跳○臣祖庚按蠻岡南史同宋書作臺岡

通鑑注云臺岡意卽臺城之來岡賭跳者賭跳躑以  
高爲勝也

十二月遂舉兵乙卯太祖入居朝堂○臣宗萬按宋順

帝紀十二月攸之反丁卯齊王入守朝堂閏月癸巳  
攸之圍郢城宋畧十二月沈攸之作亂丁卯蕭道成

入屯朝堂閏月癸巳攸之師及郢州據此攸之舉兵  
在十二月是矣而太祖居朝堂則在丁卯與此互異  
十至攻郢在閏月癸巳按宋歷閏十二月庚辰朔則癸  
巳乃閏月十四日也紀在二年正月誤矣

秉從弟領軍韞○韞諸本皆作韜但秉弟無名韜為領  
軍者今從宋書南史改韞

往哉邈乎無得而名焉○往南史作汪

南齊書卷一考證

南齊書卷二

梁

蕭

子

顯

撰

本紀第二

高帝下

建元元年夏四月甲午上即皇帝位於南郊設壇柴燎  
告天曰皇帝臣道成敢用亥牲昭告皇皇后帝宋帝陟  
鑒乾序欽若明命以命于道成夫肇自生民樹以司牧  
所以闡極則天開元創物肆茲大道天下惟公命不于  
常昔在虞夏受終上代粵自漢魏揖讓中葉咸炳諸典  
謨載在方冊水德既微仍世多故寔賴道成匡拯之功

以弘濟于厥艱大造顛隍再構區宇宣禮明刑締仁緝  
義晷緯凝象川岳表靈誕惟天人罔弗和會乃仰協歸  
運景屬與能用集大命于茲辭德匪嗣至于累仍而羣  
公卿士庶尹御事爰及黎獻至于百戎僉曰皇天眷命  
不可以固違人神無託不可以曠主畏天之威敢不祇  
順鴻歷敬簡元辰虔奉皇符升壇受禪告類上帝以永  
答民衷式敷萬國惟明靈是饗禮畢大駕還宮臨太極  
前殿詔曰五德更紹帝迹所以代昌三正迭隆王度所  
以改耀世有質文時或因革其資元膺歷經道振民固  
以異術同揆殊流共貫者矣朕以寡昧屬值艱季推肆  
勤之誠藉樂治之數賢能悉心士民致力用獲拯溺龕  
暴一匡天下業未參古功殆侔昔宋氏以陵夷有徵歷  
數攸及思弘樂推永鑒崇替爰集天祿于朕躬惟志菲  
薄辭弗獲昭遂欽從天人式繇景命祇月正于文祖升  
禋鬯于上帝猥以寡德光宅四海纂革代之蹤託王公  
之上若涉淵水罔知所濟寶祚初啓洪慶惟新思俾利  
澤宣被億兆可大赦天下改昇明三年爲建元元年賜  
人爵二級文武進位二等鰥寡孤獨不能自存者穀人  
五斛逋租宿債勿復收有犯鄉論清議贓汙淫盜一皆  
蕩滌洗除先注與之更始長徒赦繫之囚特皆原遣亡

官失爵禁錮奪勞一依舊典封宋帝爲汝陰王築宮丹陽縣故治行宋正朔車旗服色一如故事上書不爲表答表不稱詔降宋晉熙王燮爲陰安公江夏王躋爲沙陽公隨王翽爲舞陰公新興王嵩爲定襄公建安王禧爲荔浦公郡公主爲縣君縣公主爲鄉君詔曰繼世象賢列代盛典疇庸嗣美前載令圖宋氏通侯乃宜隨運省替但欽德懷義尚表墳間況功濟區夏道光民俗者哉降差之典宜遵往制南康縣公華容縣公可爲侯萍鄉縣侯可爲伯減戶有差以繼劉穆之王弘何無忌後以司空褚淵爲司徒吳郡太守柳世隆爲南豫州刺史詔曰宸運肇創寶命維新宜弘慶宥廣敷蠲汰劫賊餘口沒在臺府者悉原赦諸負豐流徙普聽還本土以齊國左衛將軍陳顯達爲中護軍中領軍王敬則爲南兗州刺史左衛將軍李安民爲中領軍戊戌以荊州刺史嶷爲尚書令驃騎大將軍開府儀同三司揚州刺史冠軍將軍映爲荊州刺史西中郎將晃爲南徐州刺史冠軍將軍垣崇祖爲豫州刺史驃騎司馬崔文仲爲徐州刺史斷四方上慶禮已亥詔曰自廬井毀制農桑易業鹽鐵妨民貨鬻傷治歷代成俗流蠹歲滋援拯遺弊革末反本使公不專利氓無失業二宮諸王悉不得營立

屯郎封略山湖太官池築宮停稅入優量省置庚子詔  
宋帝后藩王諸陵宜有守衛有司奏帝陵各置長一人  
兵有差王陵五人妃嬪三人五月丙午進河南王吐谷  
渾拾寅號驃騎大將軍詔曰宸運革命引爵改封宋氏  
第秩雖宜省替其有預劾屯夷宣力齊業者一仍本封  
無所減降有司奏留襄陽郡公張敬兒等六十二人除  
廣興郡公沈曇亮等百二十二人改元嘉歷爲建元歷  
木德盛卯終未以正月卯祖十二月未臘丁未詔曰設  
募取將懸賞購士蓋出權宜非曰恒制頃世艱險浸以  
成俗且長逋逸開罪山湖是爲黥刑不辱亡竄無咎自

今以後可斷衆募壬子詔封佐命文武功臣新除司徒  
褚淵等三十一人進爵增戶各有差乙卯河南王吐谷  
渾拾寅奉表貢獻丙辰詔遣大使分行四方遣兼散騎  
常侍十二人巡行以交寧道遠不遣使己未汝陰王薨  
追諡爲宋順帝終禮依魏元晉恭帝故事辛酉陰安公  
劉燮等伏誅追封諡上兄道度爲衡陽元王道生爲始  
安貞王丙寅追尊皇考曰宣皇帝皇妣爲孝皇后妃爲  
昭皇后六月辛未詔相國驃騎中軍三府職可依資勞  
度二官若職限已盈所餘可賜滿壬申以游擊將軍周  
山圖爲兗州刺史乙亥詔曰宋末頻年戎寇兼災疾凋

損或枯骸不收毀櫬莫掩宜速宣下埋藏營卹若標題  
猶存姓字可識可卽運載致還本鄉有司奏遣外監典  
事四人周行離門外三十五里爲限其餘班下州郡無  
棺器標題者屬所以臺錢供市庚辰七廟主備法駕卽  
于大廟詔諸將及客戮力艱難盡勤直衛其從還宮者  
普賜位一階辛巳罷荊州刺史甲申立皇太子曠斷諸  
州郡禮慶見刑入重者降一等并申前赦恩百日立皇  
子嶷爲豫章王映爲臨川王晃爲長沙王畢爲武陵王  
暉爲安成王鏘爲鄱陽王鏐爲桂陽王鑑爲廣陵王皇  
孫長懋爲南郡王乙酉葬宋順帝于遂寧陵秋七月下

未詔曰交趾北景獨隔書朔斯乃前運方季負海不朝  
因迷遂往歸款莫由曲赦交州部內李叔獻一人卽撫  
南土文武詳才選用并遣大使宣揚朝恩以試守武平  
太守行交州府事李叔獻爲交州刺史丙辰以虜僞茄  
盧鎮主陰平公楊廣香爲沙州刺史丁巳詔南蘭陵桑  
梓本鄉長蠲租布武進王業所基復十年九月辛丑詔  
二吳義興三郡遭水減今年田租乙巳以新除尚書令  
驃騎將軍豫章王嶷爲荆湘二州刺史平西將軍臨川  
王映爲揚州刺史丙午司空褚淵領尚書令戊申車駕  
幸宣武堂宴會詔諸王公以下賦詩冬十月丙子立彭

南齊書卷一  
本紀  
五  
城劉胤爲汝陰王奉宋帝後已卯車駕殷祀太廟辛巳  
詔曰朕嬰綴世務三十餘歲險阻艱難備嘗之矣末路  
屯夷戎車歲駕誠藉時來之運實資士民之力宋元徽  
二年以來諸從軍得官者未悉蒙祿可催速下訪隨正  
卽給才堪餘任者訪洗量序若四州士庶本鄉淪陷簿  
籍不存尋校無所可聽州郡保押從實除奏荒遠闕中  
正者特許據軍簿奏除或戍扞邊役末由旋反聽於同  
軍各立五保所隸有司時爲言列汝陰太妃王氏薨追  
贈爲宋恭皇后十一月庚子以太子左衛率蕭景先爲  
司州刺史辛亥立皇太子妃裴氏甲申封功臣驃騎長  
史江謐等十人爵戶各有差

二年春正月戊戌朔大赦天下以司空尚書令褚淵爲  
司徒中軍將軍張敬兒爲車騎將軍中領軍李安民爲  
領軍將軍中護軍陳顯達爲護軍將軍辛丑車駕親祀  
南郊癸卯詔索虜寇淮泗遣衆軍北伐內外纂嚴二月  
丁卯虜寇壽陽豫州刺史垣崇祖破走之置巴州壬申  
以三巴校尉明慧昭爲巴州刺史戊子以寧蠻校尉蕭  
赤斧爲雍州刺史南蠻長史崔惠景爲梁南秦二州刺  
史辛卯詔西境獻捷解嚴癸巳遣大使巡慰淮肥徐豫  
邊民尤貧遘難者刺史二千石量加賑卹甲午詔江西

北民避難流徙者制遣還本土蠲今年租稅單貧及孤老不能自存者卽聽番籍郡縣押領三月丁酉以待中西昌侯鸞爲郢州刺史戊戌以護軍將軍陳顯達爲南兗州刺史吳郡太守張岱爲中護軍己亥車駕幸樂遊苑宴王公以下賦詩辛丑以征虜將軍崔思祖爲青冀二州刺史夏四月丙寅進高麗王樂浪公高璉號驃騎大將軍五月立六門都牆六月癸未詔昔歲水旱曲赦丹陽二吳義興四郡遭水尤劇之縣元年以前三調未充虛列已畢官長局吏應共償備外詳所除宥秋七月甲寅以輔國將軍盧紹之爲青冀二州刺史戊午皇太

子妃裴氏薨閏月辛巳遣領軍將軍李安民行淮泗庚寅索虜攻朐山青冀二州刺史盧紹之等破走之冬十一月戊子以氏楊後起爲秦州刺史十二月戊戌以司空褚淵爲司徒乙巳車駕幸中堂聽訟壬子以驃騎大將軍豫章王嶷爲司空揚州刺史前將軍臨川王映爲荊州刺史

三年春正月壬戌朔詔王公卿士薦讜言丙子以平北將軍陳顯達爲益州刺史貞陽公柳世隆爲南兗州刺史皇子鋒爲江夏王領軍將軍李安民等破虜於淮陽夏四月以寧朔將軍沈景德爲廣州刺史六月壬子大

赦逋租宿債除減有差秋七月以冠軍將軍垣榮祖爲徐州刺史冬十月戊子以河南王世子吐谷渾易度侯爲西秦河二州刺史河南王


四年春正月壬戌詔曰夫膠庠之典彝倫攸先所以招振才端啓發性緒弘宇黎氓納之軌義是故五禮之迹可傳六樂之容不泯朕自膺歷受圖志闡經訓且有司羣僚奏議咸集蓋以戒車時警文教未宣思樂泮宮永言多慨今關燧無虞時和歲稔遠邇同風華夷慕義便可式遵前准脩建敦學精選儒官廣延國胄以江州刺史王延之爲右光祿大夫癸亥詔曰比歲申威西北義勇爭先殞氣寇場命盡王事戰亡蠲復雖有恒典主者遵用每傷簡簿建元以來戰亡賞蠲租布二十年雜役十年其不得收屍主軍保押亦同此例以後將軍長沙王晃爲護軍將軍中軍將軍南郡王長懋爲南徐州刺史冠軍將軍安成王暕爲江州刺史二月乙未以冠軍將軍桓康爲青冀二州刺史上不豫庚辰詔原京師囚繫有差元年以前逋責皆原除三月庚申召司徒褚淵左僕射王儉詔曰吾本布衣素族念不到此因藉時來遂隆大業風道沾被升平可期邁疾彌留至于大漸公等奉太子如事吾柔遠能邇緝和內外當令太子敦穆

親戚委任賢才崇尚節儉弘宣簡惠則天下之理盡矣  
死生有命夫復何言壬戌上崩于臨光殿年五十六四  
月庚寅上諡曰太祖高皇帝奉梓宮於東府前渚升龍  
舟丙午窆武進泰安陵上少沈深有大量寬嚴清儉喜  
怒無色博涉經史善屬文王草隸書奕棋第二品雖經  
綸夷險不廢素業從諫察謀以威重得衆卽位後身不  
御精細之物敕中書舍人桓景真曰主衣中似有玉介  
導此制始自大明末後泰始尤增其麗留此置主衣政  
是興長疾源可卽時打碎凡復有可異物皆宜隨例也  
後宮器物欄檻以銅爲飾者皆改用鐵內殿施黃紗帳  
宮人著紫皮履華蓋除金花瓜用鐵迴釘每日使我治  
天下十年當使黃金與土同價欲以身率天下移變風  
俗上姓名骨體及期運歷數竝遠應圖讖數十百條歷  
代所未有臣下撰錄上抑而不宣盛矣

史臣曰孫卿有言聖人之有天下受之也非取之也漢  
高神武駿聖觀秦氏東遊蓋是雅多大言非始自知天  
命光武聞少公之論讖亦特一時之笑語魏武初起義  
兵所期征西之墓晉宣不內迫曹爽豈有定霸浮橋宋  
氏崛起匹夫兵由義立咸皆一世推雄卒開鼎祚宋氏  
正位八君卜年五紀四絕長嫡三稱中興內難邊虞兵

革世動太祖革命之初武功潛用泰始開運大拯時艱  
龍德在田見猜雲雨之迹及蒼梧暴虐疊結朝野百姓  
慄慄命懸朝夕權道旣行兼濟天下元功振主利器難  
以假人羣才戮力實懷尺寸之望豈其天厭水行固已  
人希木德歸功與能事極乎此雖至公於四海而運實  
時來無心於黃屋而道隨物變應而不爲此皇齊所以  
集大命也

贊曰於皇太祖有命自天同度宇宙合量山淵宋德不  
紹神器虛傳寧亂以武黜暴資賢庸發西疆功與北翰  
偏師獨克孤旅霆斷援旆東夏職司靜亂指斧徐方時  
惟伐叛抗威京輦坐清江漢文藝在躬芳塵淵塞用下  
以才鎮民以德端己雄睟君臨尊默苞括四海大造家  
國



南齊書卷二

南齊書卷二考證

高帝本紀下建元元年夏四月丙寅追尊皇考曰宣皇

帝皇妣為孝皇后○臣祖庚按通鑑同南史在甲午

二月正月以司空尚書令褚淵為司徒○臣祖庚按十

二月以司空褚淵為司徒其事復見其月互異又淵

傳三年為司徒又固讓四年寢疾遜位改授司空據

此則淵以三年為司徒四年為司空而紀又云四年

八月癸卯司徒褚淵薨紀傳前後各不相顧

二月丁卯虜寇壽陽○臣祖庚按通鑑作己酉考異曰

是月辛卯朔無丁卯

五月立六門都牆○臣宗萬按通鑑云自晉以來建康

宮之外城唯設竹籬而有六門會有發白虎樽者命  
改立都牆又白虎樽卽白獸樽晉書避唐諱故曰獸  
也

河南王世子吐谷渾易度侯○易度侯諸本皆作度易  
侯今從氏羗傳改正

南齊書卷二考證

南齊書卷三

梁 蕭 子 顯 撰

本紀第三

武帝

世祖武皇帝諱贖字宣遠太祖長子也小諱龍兒生於  
建康青溪宅其夜陳孝后劉昭后同夢龍據屋上故字  
上焉初爲尋陽國侍郎辟州西曹書佐出爲贛令江州  
刺史晉安王子勛反上不從命南康相沈肅之繫上於  
郡獄族人蕭欣祖門客桓康等破郡迎出上肅之率將  
吏數百人追擊上與左右拒戰生獲肅之斬首百餘級

遂率部曲百餘人舉義兵始與相殷孚將萬兵赴子勛於尋陽或勸上擊之上以衆寡不敵避屯揭陽山中聚衆至三千人子勛遣其將戴凱之爲南康相及軍主張宗之千餘人助之上引兵向郡擊凱之別軍主程超數百人於南康口又進擊宗之破斬之遂圍郡城凱之以數千人固守上親率將士盡日攻之城陷凱之奔走殺僞贛令陶冲之上卽據郡城遣軍主張應期鄧惠真三千人襲豫章子勛遣軍主談秀之等七千人與應期相拒於西昌築營壘交戰不能決聞上將自下秀之等退散事平徵爲尚書庫部郎征北中兵參軍西陽縣子帶

南東莞太守越騎校尉正員郎劉韞撫軍長史襄陽太守別封贛縣子邑三百戶固辭不受轉寧朔將軍廣興相桂陽王休範反上遣軍襲尋陽至北嶠事平除晉熙王安西諮議不拜復還郡轉司徒右長史黃門郎沈攸之在荆楚宋朝密爲之備元徽四年以上爲晉熙王鎮西長史江夏內史行郢州事順帝立徵晉熙王燮爲撫軍揚州刺史以上爲左衛將軍輔燮俱下沈攸之事起未得朝廷處分上以中流可以待敵卽據益口城爲戰守之備太祖聞之喜曰此真我子也上表求西討不許乃遣偏軍援郢平西將軍黃回等皆受上節度加上冠

軍將軍持節昇明二年事平轉散騎常侍都督江州豫州之新蔡晉熙二郡軍事征虜將軍江州刺史持節如故封聞喜縣侯邑二千戶其年徵侍中領軍將軍給鼓吹一部府置佐史領石頭戍軍事尋又加持節督京畿諸軍事三年轉散騎常侍尚書僕射中軍大將軍開府儀同三司進爵爲公持節都督領軍如故給班劍二十人齊國建爲齊公世子改加侍中南豫州刺史給油絡車羽葆鼓吹增班劍爲四十人以石頭爲世子宮官置二率以下坊省服章一如東宮進爵王太子太祖卽位爲皇太子建元四年三月壬戌太祖崩上卽位大赦征

鎮州郡令長軍屯營部各行喪三日不得擅離任都邑城守防備幢隊一不得還乙丑稱先帝遺詔以司徒褚淵錄尚書事尚書左僕射王儉爲尚書令車騎將軍張敬兒爲開府儀同三司詔曰喪禮雖有定制先旨每存簡約內官可三日一還臨外官間一日還臨後有大喪皆如之丁卯以右衛將軍呂安國爲司州刺史庚午以司空豫章王嶷爲太尉癸酉詔曰城直之制歷代宜同頃歲逋弛遂以萬計雖在憲宜懲而原心可亮積年逋城可悉原蕩自茲以後申明舊科有違糾裁庚辰詔曰比歲未稔貧窮不少京師二岸多有其弊遣中書舍人

優量賑卹夏四月丙午以輔國將軍張倪爲兖州刺史  
辛卯追尊穆妃爲皇后五月乙丑以丹陽尹聞喜公子  
良爲南徐州刺史甲戌以新除左衛將軍垣崇祖爲豫  
州刺史癸未詔曰頃水雨頻降潮流荐滿二岸居民多  
所淹漬遣中書舍人與兩縣官長優量賑卹六月甲申  
立皇太子長懋詔申壬戌赦恩百日乙酉以鄱陽王鏘  
爲雍州刺史臨汝公子卿爲郢州刺史甲午以寧朔將  
軍臧靈智爲越州刺史丙申立皇太子妃王氏進封聞  
喜公子良爲竟陵王臨汝公子卿爲廬陵王應城公子  
敬爲安陸王江陵公子懋爲晉安王枝江公子隆爲隨  
郡王皇子子真爲建安王皇孫昭業爲南郡王戊戌詔  
曰水潦爲患星緯乖序京都囚繫可尅日訊決諸遠獄  
委刺史以時察判建康秣陵二縣貧民加賑賜必令周  
悉吳興義興遭水縣蠲除租調癸卯以司徒褚淵爲司  
空驃騎將軍秋七月庚申以衛尉蕭順之爲豫州刺史  
壬戌以冠軍將軍垣榮祖爲青冀二州刺史八月癸卯  
司徒褚淵薨九月丁巳以國哀故罷國子學己巳以前  
軍將軍姜伯起爲秦州刺史辛未以征南將軍王僧虔  
爲左光祿大夫開府儀同三司尚書右僕射王奐爲湘  
州刺史冬十二月己丑詔曰緣淮戍將久處邊勞三元

行始宜沾恩慶可遣中書舍人宣旨臨會後每歲皆如  
之庚子以太子左衛率戴僧靜爲徐州刺史

永明元年春正月辛亥車駕祀南郊大赦改元壬子詔  
內外羣僚各舉朕違肆心規諫又詔王公卿士各舉所  
知隨方登敘詔曰經邦之寄寔資莅民守宰祿俸蓋有  
恒準往以邊虞告警故沿時損益今區寓寧晏庶績咸  
熙念勤簡能宜加優獎郡縣丞尉可還田秩太尉豫章  
王嶷領太子太傅護軍將軍長沙王晃爲南徐州刺史  
鎮北將軍竟陵王子良爲南兖州刺史庚申以待中蕭  
景先爲中領軍壬戌立皇弟銳爲南平王鏗爲宜都王

皇子子明爲武昌王子罕爲南海王甲子爲築青溪舊  
宮詔槩仗瞻履二月辛巳以征虜將軍楊旻爲沙州刺  
史辛丑以隴西公宕昌王梁彌機爲河涼二州刺史東  
羌王像舒彭爲西涼州刺史三月癸丑詔曰宋德將季  
風軌陵遲列宰庶邦彌失其序遷謝遄速公私凋弊泰  
運初基草昧惟始思述先範永隆治根莅民之職一以  
小滿爲限其有聲績尅舉厚加甄異理務無庸隨時代  
黜丙辰詔曰朕自丁荼毒奄便周忌瞻言負荷若墜淵  
壑而遠圖尚蔽政刑未理星緯失序陰陽愆度思播先  
澤兼酬天肯可申辛亥赦恩五十日以期訖爲始京師

囚繫悉皆原宥三署軍徒優量降遣都邑鰥寡尤貧詳  
加賑卹戊寅詔四方見囚罪無輕重及劫賊餘口長徒  
勅繫悉原赦逋負督賊建元四年三月以前皆特除夏  
四月壬午詔曰魏矜袁紹恩洽丘墓晉亮兩王榮覃餘  
裔二代弘義前載美談袁粲劉秉與先朝同獎宋室沈  
攸之於景和之世特有迺心雖末節不終而始誠可錄  
歲月彌往宜特優降粲秉前年改葬塋兆未修材槨可  
爲經理令粗足周禮攸之及其諸子喪柩在西者可符  
荊州送反舊墓在所爲營葬事五月丁酉車騎將軍張  
敬兒伏誅六月丙寅詔凡坐事應覆治者在建元四年

三月以前皆原宥秋七月戊戌新除左光祿大夫王僧  
虔加特進九月己卯以荊州刺史臨川王暎爲驃騎將  
軍冠軍將軍廬陵王子卿爲荊州刺史吳郡太守安陸  
侯緬爲郢州刺史

二年春正月乙亥以司州刺史呂安國爲南兖州刺史  
征北將軍竟陵王子良爲護軍將軍兼司徒征北長史  
劉俊爲司州刺史丙子以右光祿大夫王延之爲特進  
三月乙亥以吳興太守張岱爲南兖州刺史前將軍王  
奐爲江州刺史平北將軍呂安國爲湘州刺史戊寅以  
少府趙景翼爲廣州刺史夏四月甲辰詔揚南徐南兖

徐兗五州統內諸獄并豫江三州府州見囚江州尋陽  
新蔡兩郡繫獄竝部送還臺須候克日斷枉直緣江遠  
郡及諸州委刺史詳察訊已巳以寧朔將軍程法勤爲  
寧州刺史六月癸卯車駕幸中堂聽訟乙巳以安陸王  
子敬爲南兗州刺史戊申以黃門侍郎崔平仲爲青冀  
二州刺史秋七月癸未詔曰夫樂所自生先哲垂誥禮  
不忘本積代同風是以漢光遲回於南陽魏文殷勤於  
譙國青溪宮體天含暉則地栖寶光定靈源允集符命  
在昔期運初開經綸方遠繕築之勞我則未暇時流事  
往永惟哽咽朕以寡薄嗣奉鴻基思存締構式表王迹  
考星創制揆日興功子來告畢規摹昭備宜申覺落之  
禮以暢感慰之懷可克日小會甲申立皇子子倫爲巴  
陵王八月丙午車駕幸舊宮小會設金石樂在位者賦  
詩詔申京師獄及三署見徒量所降宥領宮職司詳賜  
幣帛戊申車駕幸玄武湖講武甲子詔曰窆枯掩骼義  
重前誥卹老哀癯寔惟令典朕求思民瘼弗忘鑒寐聲  
德未敷物多乖所京師二縣或有久墳毀發可隨宜掩  
埋遺骸未櫬竝加斂瘞疾病窮困不能自存者詳爲條  
格竝加沾賚冬十月丁巳以桂陽王鑠爲南徐州刺史  
十一月丁亥以始興王鑿爲益州刺史

三年春正月丙辰以大司農劉楷爲交州刺史安西諮  
議參軍崔慶緒爲南梁秦二州刺史甲申以晉安王子  
懋爲南豫州刺史辛卯車駕祀南郊大赦都邑三百里  
內罪應入重者降一等餘依赦制劾繫之身降遣有差  
賑卹二縣貧民又詔曰春秋國語云生民之有學敦猶  
樹木之有枝葉果行育德成必由茲在昔開運光宅華  
夏方弘典謨克隆教思命彼有司崇建庠塾甫就經始  
仍離屯故仰瞻徽猷歲月彌遠今遐邇一體車軌同文  
宜高選學官廣延胄子又詔守宰親民之要刺史案部  
所先宜嚴課農桑相土揆時必窮地利若耕蠶殊衆足  
厲浮惰者所在卽便列奏其違方驕矜佚事妨農亦以  
名聞將明賞罰以勸勤怠校覈殿最歲竟考課以申黜  
陟二月辛丑車駕祀北郊夏四月戊戌以新除右衛將  
軍豫章王世子子響爲豫州刺史輔國將軍桓敬爲兗  
州刺史五月乙未詔曰氓俗凋弊于茲永久雖年穀時  
登而歉乏比室凡單丁之身及癯獨而秩養養孤者竝  
蠲今年田租是月省總明觀六月庚戌進河南王易度  
侯爲車騎將軍秋七月辛丑詔丹陽所領及餘二百里  
內見囚同集京師自此以外委州郡決斷甲戌左光祿  
大夫開府儀同三司王僧虔薨丁亥以驃騎中兵參軍

董仲舒爲寧州刺史八月乙未車駕幸中堂聽訟丁巳以行宕昌王梁彌頡爲河涼二州刺史戊午以尚書令王儉領太子少傅太子詹事蕭順之爲領軍將軍冬十月壬戌詔曰皇太子長懋講畢當釋奠王公以下可悉往觀禮十一月乙丑以冠軍將軍王文仲爲青冀二州刺史十二月丁酉詔曰九穀之重八材爲末是故絜粢豐盛祝史無愧於辭不籍千畝周宣所以貽諫昔期運初啓庶政草昧三推之典我則未暇朕嗣奉鴻基思隆先軌載耒躬親率由舊式可以開春發歲敬簡元辰鳴青鸞於東郊冕朱紘而莅事仰薦宗禋俯勗黔阜將使困庾內充遺秉外物旣富而教茲焉攸在是夏琅邪郡旱百姓芟除枯苗至秋擢穎大熟

四年春正月甲子以南琅邪彭城二郡太守隨郡王子隆爲江州刺史征虜長史張瓌爲雍州刺史征虜將軍薛淵爲徐州刺史護軍將軍兼司徒竟陵王子良進號車騎將軍富陽人唐寓之反聚衆桐廬破富陽錢塘等縣害東陽太守蕭崇之遣宿衛兵出討伏誅丁酉冠軍將軍馬軍主陳天福坐討唐寓之燒掠百姓棄市辛卯車駕幸中堂策秀才閏月癸巳立皇太子子貞爲邵陵王皇孫昭文爲臨汝公丁未以武都王楊集始爲北秦州

刺史辛亥車駕籍田詔曰夫耕籍所以表敬親載所以率民朕景行前規躬執良耜千畝咸事六仞可期教義克宣誠感兼暢重以天符靈貺歲月鱗萃寶鼎開玉匣之祥嘉禾發同穗之穎甘露凝暉於坳牧神爵騫翥於蘭囿斯乃宗稷之慶豈寡薄所臻思俾休和覃茲黔阜見刑罪殊死以下悉原宥諸逋負在三年以前尤窮弊者一皆蠲除孝悌力田詳授爵位孤老貧窮賜穀十石凡欲附農而糧種闕乏者竝加給貸務在優厚癸丑以始興內史劉勅爲廣州刺史甲寅以籍田禮畢車駕幸閱武堂勞酒小會詔賜王公以下在位者帛有差戊午

車駕幸宣武堂講武詔曰今親閱六師少長有禮領馭羣帥可量班賜二月己未立皇弟錄爲晉熙王鉉爲河東王庚寅以光祿大夫王玄載爲兖州刺史三月辛亥國子講孝經車駕幸學賜國子祭酒博士助教絹各有差夏四月丁亥以尚書左僕射柳世隆爲湘州刺史臨沂縣麥不登刈爲馬芻至夏更苗秀五月癸巳詔楊南徐二州今年戶租三分二取見布一分取錢來歲以後遠近諸州輸錢處竝減布直匹准四百依舊折半以爲永制丙午以吳興太守西昌侯鸞爲中領軍秋八月辛酉以鎮南長史蕭惠休爲廣州刺史九月甲寅以征虜

將軍王廣之爲徐州刺史冬十二月乙亥以東中郎司馬崔惠景爲司州刺史

五年春正月戊子以太尉豫章王嶷爲大司馬車騎將軍竟陵王子良爲司徒驃騎將軍臨川王映衛將軍王儉中軍將軍王敬則竝本號開府儀同三司都官尚書沈文季爲郢州刺史左將軍安陸王子敬爲荊州刺史征虜將軍晉安王子懋爲南兖州刺史輔國將軍建安王子真爲南豫州刺史辛卯詔曰朕昧爽丕顯思康民瘼雖年穀亟登而饑饉代有今履端肇運陽和告始宜協時休覃茲黎庶諸孤老貧病竝賜糧餼遣使親賦每

存均普雍司二州蠻虜屢動丁酉遣丹陽尹蕭景先出平陽護軍將軍陳顯達出宛葉二月戊子車駕幸芳林園禊宴丁未以護軍將軍陳顯達爲雍州刺史夏四月車駕殷祀大廟詔繫囚見徒四歲刑以下悉原遣五年減爲三歲京邑罪身應入重降一等六月辛酉詔曰比霖雨過度水潦洊溢京師居民多離其弊遣中書舍人二縣官長隨宜賑賜秋七月戊申詔丹陽屬縣建元四年以來至永明三年所逋田租殊爲不少京甸之內宜加優貸其非中貧者可悉原停八月乙亥詔今夏雨水吳興義興二郡田農多傷詳蠲租調九月己丑詔曰九

日出商飈館登高宴羣臣辛卯車駕幸商飈館館上所  
立在孫陵崗世呼爲九日臺者也丙午詔曰善爲國者  
使民無傷而農益勸是以十一而稅周道克隆開建常  
平漢載惟穆岱畎絲枲浮汶來貢杞梓皮革必緣楚往  
自水德將謝喪亂彌多師旅歲興饑饉代有貧室盡於  
課調泉貝傾於絕域軍國器用動資四表不因厥產咸  
用九賦雖有交貿之名而無潤私之實民咨塗炭是此  
之由昔在開運星紀未周餘弊尚重農桑不殷於曩日  
粟帛輕賤於當年工商罕兼金之儲匹夫多饑寒之患  
良由園法久廢上弊稍寡所謂民失其資能無匱乎凡

下貧之家可蠲三調二年京師及四方出錢億萬糶米  
穀絲絲之屬其和價以優黔首遠邦嘗市雜物非土俗  
所產者皆悉停之必是歲賦攸宜都邑所乏可見直和  
市勿使逋刻冬十月甲申以中領軍西昌侯鸞爲豫州  
刺史侍中安陸侯緬爲中領軍初起新林苑

六年春正月壬午以祠部尚書安成王暉爲南徐州刺  
史詔二百里內獄同集京師克日聽覽自此以外委州  
郡訊察三署徒隸詳所原釋三月己亥以豫章王世子  
子響爲巴東王癸卯以光祿大夫周盤龍爲行兖州刺  
史五月甲午以宕昌王梁彌承爲河涼二州刺史六月

甲寅以散騎常侍沈景德爲徐州刺史丙子以始興太守房法乘爲交州刺史秋七月乙巳都官尚書呂安國爲領軍將軍八月乙卯詔吳興義興水潦被水之鄉賜瘡疾篤瘥口二斛老疾一斛小口五斗九月壬寅車駕幸琅邪城講武習水步軍冬十月庚申立冬初臨太極殿讀時令辛酉以祠部尚書武陵王暉爲江州刺史閏月乙卯詔曰北兖北徐豫司青冀八州邊接疆場民多懸罄原永明以前所逋租調辛卯以尚書僕射王奐爲領軍將軍十一月乙卯以羽林監費延宗爲越州刺史庚申以後將軍晉安王子懋爲湘州刺史西陽王子明

爲南兖州刺史

七年春正月丙午以中軍將軍王敬則爲豫州刺史中軍將軍陰智伯爲梁南秦二州刺史戊申詔曰雍州頻歲戎役兼水旱爲弊原四年以前逋租辛亥車駕祀南郊大赦京邑貧民普加賑賜又詔曰春頒秋斂萬邦所以惟懷柔遠能邇兆民所以允殖鄭渾宰邑因姓立名王濬剖符戶口殷盛今產子不育雖炳常禁比聞所在猶或有之誠復禮以貧殺抑亦情由俗淡宜節以嚴威敦以惠澤主者尋舊制詳量附定蠲卹之宜務存優厚壬戌驃騎將軍開府儀同三司臨川王映薨戊辰詔曰

諸大夫年秩隆重祿力殊薄豈所謂下車惟舊趨橋敬老可增俸詳給見役二月丙子以左衛將軍巴東王子響爲中護軍己丑詔曰宣尼誕敷文德峻極自天發輝七代陶鈞萬品英風獨舉素王誰匹功隱於當年道深於日月感麟厭世緬邈千祀川竭谷虛丘夷淵塞非但洙泗湮淪至乃饗嘗之主前王敬仰崇脩寢廟歲月亟流鞠爲茂草今學敦興立實稟洪規撫事懷人彌增欽屬可改築宗祊務在爽塏量給祭秩禮同諸侯奉聖之爵以時紹繼壬寅以丹陽尹王晏爲江州刺史癸卯以巴陵王子倫爲豫州刺史三月丁未以太子右衛率王

玄邈爲兖州刺史庚戌以中護軍巴東王子響爲江州刺史中書令隨郡王子隆爲中護軍甲寅立皇子子岳爲臨賀王子峻爲廣漢王子琳爲宣城王子珉爲義安王夏四月戊寅詔曰婚禮下達人倫攸始周官設媒氏之職國風興及時之詠四爵內陳義不期侈三鼎外列事豈存奢晚俗浮麗歷茲永久每思懲革而民未知禁乃聞同牢之費華泰尤甚膳羞方丈有過王侯富者扇其驕風貧者恥躬不逮或以供帳未具動致推遷年不再來盛時忽往宜爲節文頌之士庶竝可擬則公朝方標供設合卷之禮無虧寧儉之義斯在如故有違繩之

以法五月乙巳尚書令衛將軍開府儀同三司王儉薨  
甲子以新除尚書左僕射柳世隆爲尚書令六月丁亥  
車駕幸琅邪秋八月庚子以左衛將軍建安王子眞爲  
中護軍冬十月巳丑詔曰三季澆浮舊章陵替吉凶奢  
靡動違矩則或裂錦繡以競車服之飾塗金鏤石以窮  
瑩域之麗至班白不婚露棺累葉苟相媵衒罔顧大典  
可明爲條制嚴勒所在悉使畫一如復違犯依事糾奏  
十二月巳亥以中護軍建安王子眞爲郢州刺史江州  
刺史巴東王子響爲荊州刺史前安西司馬垣榮祖爲  
兖州刺史

八年春正月庚子征西大將軍王敬則進號驃騎大將  
軍左將軍沈文季爲領軍將軍丹陽尹鄱陽王鏘爲江  
州刺史詔放遣隔城虜俘聽還本土壬辰零陵王司馬  
藥師薨夏四月戊辰詔公卿已下各舉所知隨才授職  
進得其人受登賢之賞薦非其才獲濫舉之罰秋七月  
辛丑以會稽太守安陸侯緬爲雍州刺史癸卯詔曰陰  
陽舛和緯象愆度儲胤嬰患淹歷旬晷思仰祇天戒俯  
紆民瘼可大赦天下癸亥詔司雍二州比歲不稔雍州  
八年以前司州七年以前逋租悉原汝南一郡復限更  
申五年八月丙寅詔京邑霖雨旣過居民汎濫遣中書

舍人二縣官長賑卹乙酉以行河南王世子休留代爲  
秦河二州刺史壬辰以左衛將軍隨郡王子隆爲荊州  
刺史巴東王子響有罪遣丹陽尹蕭順之率軍討之子  
響伏誅冬十月丁丑詔吳興水淹過度開所在倉賑賜  
癸巳原建元以前逋租十一月乙卯以建武將軍伏登  
之爲交州刺史十二月乙丑以振威將軍陳僧授爲越  
州刺史戊寅詔尚書丞郎職事繁劇卹俸未優可量增  
賜祿已卯皇子子建爲湘東王癸巳以監青冀二州軍  
行刺史事張沖爲青冀二州刺史

九年春正月甲午以侍中江夏王鋒爲南徐州刺史冠  
軍將軍劉悛爲益州刺史辛丑車駕祀南郊詔京師見  
囚繫詳量原遣三月乙卯以南中郎司馬劉楷爲司州  
刺史辛丑以太子左衛率劉纘爲廣州刺史夏四月乙  
亥有司奏舊格一年兩過行陵三月十五日曹郎以下  
小行九月十五日司空以下大行今長停小行唯二州  
一大行詔曰可六月甲戌以尚書左僕射王奐爲雍州  
刺史秋九月戊辰車駕幸琅邪城講武觀者傾都普頒  
酒肉

十年春正月戊午詔諸責負衆逋七年以前悉原除高  
貲不在例孤老六疾人穀五斛內外有務衆官增祿俸

南齊書卷三  
以左民尚書南平王銳爲湘州刺史司徒竟陵王子良  
領尚書令右衛將軍王玄邈爲北徐州刺史中軍將軍  
廬陵王子卿進號車騎將軍北中郎將南海王子罕爲  
兖州刺史輔國將軍臨汝公昭文爲南豫州刺史冠軍  
將軍王文和爲北兖州刺史二月壬寅鎮軍將軍陳顯  
達領中領軍夏四月辛丑大司馬豫章王嶷薨五月己  
巳司徒竟陵王子良爲揚州刺史秋八月丙申以新城  
太守郭安明爲寧州刺史冬十月乙丑車駕幸玄武湖  
講武甲午車駕殷祀太廟十一月戊午詔曰頃者霖雨  
樵糧稍貴京邑居民多離其弊遣中書舍人二縣官長

賑賜

十一年春正月癸丑詔京師見繫囚詳所原遣以驃騎  
大將軍王敬則爲司空江州刺史鄱陽王鏘爲領軍將  
軍鎮軍大將軍陳顯達爲江州刺史右衛將軍崔慧景  
爲豫州刺史丙子皇太子長懋薨二月壬午以車騎將  
軍廬陵王子卿爲驃騎將軍南豫州刺史撫軍將軍安  
陸王子敬進號車騎將軍己丑輔國將軍曹虎爲梁南  
秦二州刺史癸卯以新除中書監晉安王子懋爲雍州  
刺史丙午以冠軍將軍王文和爲益州刺史三月乙亥  
雍州刺史王奐伏誅夏四月壬午詔東宮文武臣僚可

悉度爲太孫官屬甲午立皇太孫昭業太孫妃何氏詔  
賜天下爲父後者爵一級孝子順孫義夫節婦粟帛各  
有差癸卯以驍騎將軍劉靈哲爲兖州刺史五月戊辰  
詔曰水旱成災穀稼傷弊凡三調衆逋可同申至秋登  
京師二縣朱方姑熟可權斷酒庚午以輔國將軍蕭惠  
休爲徐州刺史丙子以左民尚書宜都王鏗爲南豫州  
刺史六月壬午詔霖雨旣過遣中書舍人二縣官長賑  
賜京邑居民秋七月丁巳詔曰頃風水爲災二岸居民  
多離其患加以貧病六疾孤老稚弱彌足矜念遣中書  
舍人履行沾卹又詔曰水旱爲災實傷農稼江淮之間


倉廩旣虛遂草竊充斥互相侵奪依阻山湖成此逋逃  
曲赦南兖兖豫司徐五州南豫州之歷陽譙臨江廬江  
四郡三調衆逋宿債竝同原除其緣淮及青冀新附僑  
民復除已訖更申五年是月上不豫徙御延昌殿乘輿  
始登階而殿屋鳴咤土惡之虜侵邊戍辰遣江州刺史  
陳顯達鎮雍州樊城上慮朝野憂惶乃力疾召樂府奏  
正聲伎戊寅大漸詔曰始終大期賢聖不免吾行年六  
十亦復何恨但皇業艱難萬幾事重不能無遺慮耳太  
孫進德日茂社稷有寄子良善相毗輔思弘治道內外  
衆事無大小悉與鸞參懷共下意尚書中是職務根本

悉委王晏徐孝嗣軍旅捍邊之畧委王敬則陳顯達王廣之王玄邈沈文季張瓌薛淵等百辟庶僚各奉爾職謹事太孫勿有懈怠知復何言又詔曰我識滅之後身上著夏衣畫天衣純烏犀導應諸器悉不得用寶物及織成等唯裝複袂衣各一本通常所服身刀長短二口鐵環者隨我入梓宮祭敬之典本在因心東隣殺牛不如西家禴祭我靈上慎勿以牲爲祭唯設餅茶飲干飯酒脯而已天下貴賤咸同此制未山陵前朔望設菜食陵墓萬世所宅意嘗恨休安陵未稱今可用東三處地最東邊以葬我名爲景安陵喪禮每存省約不須煩民百官停六時入臨朔望祖日可依舊諸主六宮竝不須從山陵內殿鳳華壽昌耀靈三處是吾所治製夫貴有天下富兼四海宴處寢息不容乃陋謂此爲奢儉之中慎勿壞去顯陽殿玉像諸佛及供養具如別牒可盡心禮拜供養之應有功德事可專在中自今公私皆不得出家爲道及起立塔寺以宅爲精舍竝嚴斷之唯年六十必有道心聽朝賢選序已有別詔諸小小賜乞及閣內處分亦有別牒內外禁衛勞舊主帥左右悉付蕭謙優量驅使之勿負吾遺意也是日上崩年五十四上剛毅有斷爲治總大體以富國爲先頗不喜遊宴雕綺之

事言常恨之未能頓遣臨崩又詔凡諸遊費宜從休息自今遠近薦獻務存節儉不得出界營求相高奢麗金粟繒纈弊民已多珠玉玩好傷工尤重嚴加禁絕不得有違准繩九月丙寅葬景安陵

史臣曰世祖南面嗣業功參寶命雖爲繼體事實艱難御衮垂旒深存政典文武授任不革舊章明罰厚恩皆由上出義兼長遠莫不肅然外表無塵內朝多豫機事平理職貢有恒府藏內充民鮮勞役宮室苑囿未足以傷財安樂延年衆庶所同幸若夫割愛懷抱同彼甸人太祖羣昭位後諸穆昔漢武留情晚悟追恨戾園魏文侯克中山不以封弟英賢心迹臣所未詳也

贊曰武帝不顯徽號止戈韶嶺歇禋彭泅澄波威承景歷肅御金科北懷戎款南獻夷歌市朝晏逸中外寧和



南齊書卷三

南齊書卷三考證

武帝本紀生獲肅之斬首百餘級遂率部曲百餘人舉

義兵○臣祖庚按宋書鄧琬傳云世子與南康相沈

用之等據郡起義宋畧亦云沈肅之以郡招起義据

此則帝與肅之同起義矣與紀互異又按通鑑考異

曰贖始自獄中劫出琬所署南康相不容便與之同

則宋書誤也

三年八月丁巳以行宕昌王梁彌頡為河涼二州刺史

○臣祖庚按魏書三年七月魏遣使拜宕昌王梁彌

機兄子彌承為宕昌王與此互異

六年十月初臨太極殿讀時令○臣宗萬按漢儀太史

每歲上其年歷先立春立夏大暑立秋立冬常讀五  
時令皇帝所服各隨五時之色帝升御座尚書令以  
下就席位尚書三公郎以令署按上奏以入就席伏  
讀訖賜酒一卮据此武帝是舉蓋遵古制前此未行  
故曰初臨也

南齊書卷三考證

南齊書卷四

梁 蕭 子 顯 撰

本紀第四

鬱林王

鬱林王昭業字元尚文惠太子長子也小名法身世祖  
卽位封南郡王二千戶永明五年十一月戊子冠於東  
宮崇政殿其日小會賜王公以下帛各有差給昭業扶  
二人七年有司奏給班劍二十人鼓吹一部高選友學  
十一年給阜輪三望車詔高選國官文惠太子薨立昭  
業爲皇太孫居東宮世祖崩太孫卽位八月壬午詔稱

先帝遺詔以護軍將軍武陵王騫爲衛將軍征南大將軍陳顯達卽本號竝開府儀同三司尙書左僕射西昌侯鸞爲尙書令太孫詹事沈文季爲護軍將軍癸未以司徒竟陵王子良爲太傅詔曰朕以寡薄嗣膺寶政對越靈命欽若前圖思所以敬守成規拱揖羣后哀荒在日有懼大猷宜育德振民光昭睿範凡逋三調及衆債在今年七月三十日前悉同蠲除其備償封籍貨鬻未售亦皆還主御府諸署池田邸冶興廢公事本施一時於今無用者詳所罷省公宜權禁一以還民關市征賦務從優減丙戌詔曰近北掠餘口悉充軍實刑故無小罔或攸赦撫辜興仁事深睿範宜從蕩宥許以自新一同放遣還復民籍已賞賜者亦皆爲贖辛丑詔曰往歲蠻虜協謀志擾邊服羣帥授畧大殲凶醜革城克捷及舞陰固守二處勞人未有沾爵賞者可分遣選部往彼序用九月癸丑詔東西二省府國長屯所積財單祿寡良以矜懷選部可甄才品能推校年月邦守邑丞隨宜量處以貧爲先辛酉追尊文惠皇太子爲世宗文皇帝冬十月壬寅尊皇太孫太妃爲皇太后立皇后何氏十一月辛亥立臨汝公昭文爲新安王曲江公昭秀爲臨海王皇弟昭粲爲永嘉王

隆昌元年春正月丁未改元大赦加太傅竟陵王子良  
殊禮驍騎將軍晉熙王錄爲郢州刺史丹陽尹安陸王  
子敬爲南兖州刺史征北大將軍晉安王子懋爲江州  
刺史臨海王昭秀爲荊州刺史永嘉王昭粲爲南徐州  
刺史征南大將軍陳顯達進號車騎大將軍郢州刺史  
建安王子真爲護軍將軍詔百僚極陳得失又詔王公  
以下各舉所知戊申以護軍將軍沈文季爲領軍將軍  
己酉以前將軍曹虎爲雍州刺史右衛將軍薛淵爲司  
州刺史庚戌以寧朔將軍蕭懿爲梁南秦二州刺史輔  
國長史申希祖爲交州刺史辛亥車駕祀南郊詔曰執

耜慙忘懸磬比室秉機或情無褐終年非怠非荒雖由  
王道不稂不莠實賴民和頃歲多稼無爽遺秉如積而  
三登之善未臻萬斯之基尙遠且風土異宜百民舛務  
刑章治緒未必同源妨本害政事非一揆冕旒屬念無  
忘夙興可嚴下州郡務滋耕殖相畝闢疇廣開地利深  
樹國本克阜民天又詢訪獄市博聽謠俗傷風損化各  
以條聞主者詳爲條格戊午車駕拜景安陵己巳以新  
除黃門侍郎周奉叔爲青州刺史二月辛卯車駕祀明  
堂夏四月辛巳衛將軍開府儀同三司武陵王曄薨戊  
子太傅竟陵王子良薨戊戌以前沙州刺史楊昺爲沙

州刺史丁酉以驃騎將軍廬陵王子卿爲衛將軍尙書  
右僕射鄱陽王鏘爲驃騎將軍竝開府儀同三司閏月  
乙丑以南東海太守蕭穎胄爲青冀二州刺史丁卯鎮  
軍大將軍鸞卽本號開府儀同三司戊辰以中軍將軍  
新安王昭文爲揚州刺史六月丙寅以黃門侍郎王思  
遠爲廣州刺史秋七月庚戌以中書郎蕭遙欣爲兗州  
刺史東莞太守臧靈智爲交州刺史癸巳皇太后令曰  
鎮軍車騎左僕射前將軍領軍左衛衛尉八座自我皇  
歷啓基受終于宋睿聖繼軌三葉重光太祖以神武創  
業草昧區夏武皇以英明提極經緯天人文帝以上哲

之資體元良之重雖功未被物而德已在民三靈之眷  
方永七百之基已固嗣主特鍾沴氣爰表弱齡險戾著  
于綠車愚固彰於崇正狗馬是好酒色方酒所務唯鄙  
事所疾唯善人世祖慈愛曲深每加容掩冀年志稍改  
立守神器自入纂鴻業長惡滋甚居喪無一日之哀縗  
經爲歡宴之服昏酣長夜萬機斯壅發號施令莫知所  
從闔豎徐龍駒專總樞密奉叔珍之互執權柄自以爲  
任得其人表裏緝穉邁蕭曹而愈信布倚太山而坐平  
原於是恣情肆意罔顧天顯二帝姬嬪竝克寵御二宮  
遺服皆納玩府內外混漫男女無別丹屏之北爲酤鬻

之所青蒲之上開桑中之肆又微服潛行信次忘反端  
委以朝虛位交戟而守空宮積旬矣宰輔忠賢盡誠奉  
主誅鋤羣小冀能悛革曾無克己更深怨憾公卿股肱  
以異已寘戮文武昭穆以德譽見猜放肆醜言將行屠  
膾社稷危殆有過綴旒昔太宗克光於漢世簡文代興  
於晉氏前事之不忘後人之師也鎮軍居正體道家國  
是賴伊霍之舉實寄淵謨便可詳依舊典以禮廢黜中  
軍將軍新安王體自文皇睿哲天秀宜入嗣鴻業永寧  
四海外卽以禮奉迎未亡人屬此多難投筆增慨昭業  
少美容止好隸書世祖勅皇孫手書不得妄出以貴重

之進對音吐甚有令譽王侯五日一問訊世祖常獨呼  
昭業至幄座別加撫問呼爲法身鍾愛甚重文惠皇太  
子薨昭業每臨哭輒號咷不自勝俄尒還內歡笑極樂  
在世祖喪哭泣竟入後宮嘗列胡妓二部夾閣迎奏爲  
南郡王時文惠太子禁其起居節其用度昭業謂豫章  
王妃庾氏曰阿婆佛法言有福德生帝王家今日見作  
天王便是大罪左右主帥動見拘執不如作市邊屠酤  
富兒百倍矣及卽位極意賞賜動百數十萬每見錢輒  
曰我昔時思汝一文不得今得用汝未期年之間世祖  
齋庫儲錢數億垂盡開主衣庫與皇后寵姬觀之給闈


人豎子各數人隨其所欲恣意輦取取諸寶器以相剖擊破碎之以爲笑樂居嘗躰袒著紅縠禪雜采袒服好鬪雞密買雞至數千價世祖御物甘草杖宮人寸斷用之毀世祖招婉殿乞闈人徐龍駒爲齋龍駒尤親幸爲後閣舍人日夜在六宮房內昭業與文帝幸姬霍氏淫通龍駒勸長留宮內聲云度霍氏爲尼以餘人代之嘗以邪諂自進每謂人曰古時亦有監作三公者皇后亦淫亂齋閣通夜洞開內外淆雜無復分別中書舍人綦母珍之朱隆之直閣將軍曹道剛周奉叔竝爲帝羽翼高宗屢諫不納先啓誅龍駒次誅奉叔及珍之帝竝不

能違旣而尼媪外入頗傳異語乃疑高宗有異志中書令何胤以皇后從叔見親使直殿省嘗隨后呼胤爲三父與胤謀誅高宗令胤受事胤不敢當依違杜諫帝意復止乃謀出高宗於西州中勅用事不復關諮高宗慮變定謀廢帝二十一日壬辰使蕭湛坦之等於省誅曹道剛朱隆之等率兵自尙書入雲龍門戎服加朱衣於上比入門三失履王晏徐孝嗣蕭坦之陳顯達王廣之沈文季係進帝在壽昌殿聞外有變使閉內殿諸房閣令闈人登興光樓望還報去見一人戎服從數百人急裝在西鍾樓下須臾蕭湛領兵先入宮截壽昌閣帝走

向愛姬徐氏房拔劍自刺不中以帛纏頸輿接出延德殿  
謀初入殿宿衛將士皆操弓楯欲拒戰謀謂之曰所  
取自有人卿等不須動宿衛信之及見帝出各欲自奮  
帝竟無一言出西弄殺之時年二十一輿尸出徐龍駒  
宅殯葬以王禮餘黨亦見誅

史臣曰鬱林王風華外美衆所同惑伏情隱詐難以貌  
求立嫡以長未知瑕釁世祖之心不變周道旣而訾鄙  
內作兆自宮闈雖爲害未遠足傾社稷春秋書梁伯之  
過言其自取亡也



贊曰十誓有一無國不失鬱林負荷棄禮亡律




南齊書卷四

南齊書卷四考證

鬱林王本紀出西弄○臣祖庚按通鑑注云此延德殿之西弄也集韻曰弄厦也屏也亦作屏





南齊書卷四考證

南齊書卷五

梁

蕭

子

顯

撰

本紀第五

海陵王

海陵恭王昭文字季尚文惠太子第二子也永明四年封臨汝公邑千五百戶初為輔國將軍濟陽太守十年轉持節督南豫州諸軍事南豫州刺史將軍如故十一年進號冠軍將軍文惠太子薨還都鬱林王即位為中軍將軍領兵置佐封新安王邑二千戶隆昌元年為使持節都督揚南徐二州諸軍事揚州刺史將軍如故其

乾隆四年校刊

南齊書卷五

本紀

一

年鬱林王廢尙書令西昌侯鸞議立昭文爲帝延興元年秋七月丁酉卽皇帝位以尙書令鎮軍大將軍西昌侯鸞爲驃騎大將軍錄尙書事揚州刺史宣城郡公詔曰太祖高皇帝英謀光大受命作齊世祖武皇帝宏猷冠世繼暉下武世宗文皇帝清明懿鑠四海宅心竝德漏下泉功昭上象聲教所覃無思不洽洪基式固景祚方融而天步多阻運鍾否剝嗣君昏忍暴戾滋多棄侮天經悖滅人紀朝野重足遐邇側視民怨神恫宗祧如綴賴忠謨肅舉霄漢廓清俾三后之業絕而更紐七百之慶危而復安猥以冲人入纂乾緒載懷馭朽若墜諸

淵思與黎元共綏馘福大赦改元文武賜位二等八月甲辰以新除衛尉蕭湛爲中領軍司空王敬則進位太尉新除車騎大將軍陳顯達爲司空尙書左僕射王晏爲尙書令左衛將軍王廣之爲豫州刺史驃騎大將軍鄱陽王鏘爲司徒詔遣大使巡行風俗丁未詔曰新安國五品以上悉與滿叙自此以下皆聽解遣其欲仕者適其所樂以驍騎將軍河東王鉉爲南徐州刺史西中郎將臨海王昭秀爲車騎將軍南徐州刺史永嘉王昭粲爲荊州刺史戊申以輔國將軍王詡爲廣州刺史中書郎蕭遙欣爲兖州刺史庚戌以車騎板行參軍李慶

綜爲寧州刺史辛亥以安西將軍王玄邈爲中護軍新  
除後軍司馬蕭誕爲徐州刺史壬子以冠軍司馬臧靈  
智爲交州刺史乙卯申明織成金薄綵花錦繡履之禁  
九月癸酉詔曰頃者以淮關徭戍勤瘁於行役故覃以  
榮階薄酬厥勞勲狀淹留未集王府非所以急舍爵之  
典趣報功之旨便可分遣使部往彼銓用辛巳以前九  
真太守宋慈明爲交州刺史癸未誅新除司徒鄱陽王  
鏘中軍大將軍隨郡王子隆遣平西將軍王廣之誅南  
兗州刺史安陸王子敬於是江州刺史晉安王子懋起  
兵遣中護軍王玄邈討之乙未驃騎大將軍鸞假黃鉞  
內外纂嚴又誅湘州刺史南平王銳郢州刺史晉熙王  
鈺南豫州刺史宜都王鏗丁亥以衛將軍廬陵王子卿  
爲司徒撫軍將軍桂陽王鐸爲中軍將軍開府儀同三  
司冬十月癸巳詔曰周設媒官趣及時之制漢務輕徭  
在休息之典所以布德弘教寬俗阜民朕君制八紘志  
敷九德而習俗之風爲弊未改靜言多愠無忘昏昃督  
勸婚嫁宜嚴更申明必使禽幣以時標梅息怨正廚諸  
役舊出州郡徵吏民以應其數公獲二旬私累數朔又  
廣陵年常遞出千人以助淮戍勞擾爲煩抑亦苟直是  
育今竝可長停別量所出諸縣使村長路都防城直縣

爲劇尤深亦宜禁斷丁酉解嚴進驃騎大將軍揚州刺史宣城公鸞爲太傅領大將軍揚州牧加殊禮進爵爲王戊戌誅新除中軍將軍桂陽王鑠撫軍將軍衡陽王鈞侍中祕書監江夏王鋒鎮軍將軍建安王子真左將軍巴陵王子倫癸卯以寧朔將軍蕭遙欣爲豫州刺史新除黃門郎蕭遙昌爲郢州刺史輔國將軍蕭誕爲司州刺史宣城王輔政帝起居皆諮而後行思食蒸魚菜太官令荅無錄公命竟不與辛亥皇太后令曰司空後將軍丹陽尹右僕射中領軍八座夫明晦迭來屯平代有上靈所以睠命億兆所以歸懷自皇家淳耀列聖繼

軌諸侯官方百神受職而殷憂時啓多難薦臻隆昌失德特紊人鬼非徒四海解體乃亦九鼎將移賴天縱英輔大匡社稷崩基重造隆典再興嗣主勿沖庶政多昧且早嬰疴疾弗克負荷所以宗正內侮戚藩外叛覘天視地人各有心雖王祖之德在民而七廟之危行及自非樹以長君鎮以淵器未允天人之望寧息奸宄之謀太傅宣城王肩體宣皇鍾慈太祖識冠生民功高造物符表夙著謳頌有在宜人承寶命式寧宗祏帝可降封海陵王吾當歸老別館昔宣帝中興漢室簡文重延晉祀庶我鴻基於茲永固言念家國感慶載懷建武元年

詔海陵王依漢東海王彊故事給虎賁旄頭畫輪車設  
鍾虞宮縣供奉所須每存隆厚十一月稱王有疾數遣  
御師占視乃殞之給溫明祕器衣一襲斂以袞冕之服  
大鴻臚監護喪事葬給輜輶車九旒大輅黃屋左纛前  
後部羽葆鼓吹挽歌二部依東海王故事諡曰恭王年  
十五

史臣曰郭璞稱禾昌之名有二日之象而隆昌之號亦  
同焉案漢中平六年獻帝卽位便改元爲光熹張讓段  
珪誅後改元爲昭寧董卓輔政改元爲永漢一歲四號  
也晉惠帝太安二年長沙王乂事敗成都王穎改元爲  
永安穎自鄴奪河間王顥復改元爲永興一歲三號也  
隆昌延興建武亦三改年號故知喪亂之軌迹雖千載  
而必同矣

贊曰穆穆海陵困亡代興不先不後遭命是膺




南齊書卷五

南齊書卷五考證

海陵王本紀延興元年○是年即隆昌元年以廢立隨改元耳

八月丁未詔曰新安國五品以上悉與滿敘○南史不載海陵以新安入纂故云




南齊書卷五考證

五

南齊書卷五考證

南齊書卷五考證



南齊書卷六

本紀第六

明帝

梁蕭子顯撰

高宗明皇帝諱鸞字景栖始安貞王道生子也小諱玄度少孤太祖撫育恩過諸子宋泰豫元年為安吉令有嚴能之名補武陵王左常侍不拜元徽二年為永世令昇明二年為邵陵王安南記室參軍未拜仍遷寧朔將軍淮南宣城二郡太守尋進號輔國將軍太祖踐阼遷侍中封西昌侯邑千戶建元二年為持節督郢州司州

乾隆四年校刊

南齊書卷六

本紀

一

之義陽諸軍事冠軍將軍郢州刺史進號征虜將軍世祖卽位轉度支尚書領右軍將軍永明元年遷侍中領驍騎將軍王子侯舊乘纏帷車高宗獨乘下帷儀從如素士公事混撓販食人擔火誤燒牛鼻豫章王白世祖世祖笑焉轉爲散騎常侍左衛將軍清道而行上甚悅二年出爲征虜將軍吳興太守四年遷中領軍常侍竝如故五年爲持節監豫州郢州之西陽司州之汝南二郡軍事右將軍豫州刺史七年爲尚書右僕射八年加領衛尉十年轉左僕射十二年領右衛將軍世祖遺詔爲侍中尚書令尋加鎮軍將軍給班劍二十人隆昌元年卽本號爲大將軍給鼓吹一部親兵五百人尋又加中書監開府儀同三司鬱林王廢海陵王立爲使持節都督揚南徐二州軍事驃騎大將軍錄尚書事揚州刺史開府如故增班劍爲三十人封宣城郡公二千戶鎮東府城給兵五千人錢二百萬布千匹九江作難假黃鉞事寧表送之尋加黃鉞都督中外諸軍事太傅領大將軍揚州牧增班劍爲四十人給幢絡三望車前後部羽葆鼓吹劍履上殿入朝不趨贊拜不名置左右長史司馬從事中郎掾屬各四人封宣城王邑五千戶持節侍中中書監錄尚書竝如故未拜太后令廢海陵王以

上入纂太祖爲第三子羣臣三請乃受命

建武元年冬十月癸亥卽皇帝位詔曰皇齊受終建極握鏡臨宸神武重輝欽明懿鑠七百攸長盤石斯固而王度中蹇天階荐阻嗣命多違蕃疊孔棘宏圖景歷將墜諸淵宣德皇后遠鑒崇替憲章舊典疇咨台揆允定靈策用集寶命于予一人猥以虛薄纘承大業仰繫鴻丕顧臨兆民永懷先構若履春冰寅憂夕惕罔識攸濟思與萬國播此惟新大赦天下改元宿衛身普轉一階其餘文武賜位二等逋租宿責換負官物在建武元年以前悉原除劫賊餘口在臺府者可悉原放負豐流徙竝還本鄉太尉王敬則爲大司馬司空陳顯達爲太尉尙書令王晏加驃騎大將軍中領軍蕭湛爲領軍將軍南徐州刺史皇子寶義爲揚州刺史中護軍王玄邈爲南兗州刺史新除右將軍張瓌爲右光祿大夫平北將軍王廣之爲江州刺史乙丑詔斷遠近上禮丁卯詔自今彫文篆刻歲時光新可悉停省蕃牧守宰或有薦獻事非任土嚴加禁斷追贈安陸昭侯緬爲安陸王己巳以安陸侯子寶晷爲湘州刺史詔曰頃守職之吏多違舊典存私害公實與民蠹今商旅稅石頭後渚及夫鹵借倩一皆停息所在凡厥公宜可卽符斷主曹詳爲其

制憲司明加聽察十一月癸酉以西中郎長史始安王遙光爲揚州刺史晉壽太守王洪範爲青冀二州刺史尙書令王晏領太子少傅甲戌大司馬尋陽公王敬則等十三人進爵邑各有差詔省新林苑先是民地悉以還主原責本直庚辰立皇子寶義爲晉安王寶立爲江夏王寶源爲廬陵王寶寅爲建安王寶融爲隨郡王寶攸爲南平王甲申詔曰邑宰祿薄俸微不足代耕雖任土恒貢亦爲勞費自今悉斷又詔宣城國五品以上悉與滿敘自此以下皆聽解遣其欲仕適所樂乙酉追尊始安貞王爲景皇妃爲懿后丙戌以輔國將軍聞喜公

遙欣爲荊州刺史寧朔將軍豐城公遙昌爲豫州刺史丁亥詔細作中署材官車府凡諸工可悉開番假遞令休息戊子立皇太子寶卷賜天下爲父後者爵一級孝子順孫義夫節婦普加甄賜明揚表其衡閭賚以束帛己丑詔東宮肇建遠近或有慶禮可悉斷之壬辰以新除征虜將軍江夏王寶立爲郢州刺史永明中御史中丞沈淵表百官年登七十皆令致仕竝窮困私門庚子詔曰日者百司耆齒許以自陳東西二省猶沾微俸辭事私庭榮祿兼謝興言愛老實有矜懷自縉紳年及可一遵永明七年以前銓敘之科上輔政所誅諸王是月

復屬籍各封子爲侯十二月壬子詔曰上覽易遺下情  
難達是以甘棠見美肺石流詠自月一視黃辭如有含  
枉不申懷直未舉者莅民之司竝任厥失  
二年春正月辛未詔京師繫囚殊死可降爲五歲刑三  
署見徒五歲以下悉原赦王公以下各舉所知隨王公  
卿士內外羣僚各舉朕違肆心極諫索虜寇司豫徐梁  
四州壬申遣鎮南將軍王廣之督司州征討右衛將軍  
蕭坦之督徐州征討尚書右僕射沈文季督豫州征討  
己卯詔京師二縣有毀發墳壠隨宜修理又詔曰食惟  
民天義高姬載蠶實生本教重軒經前哲盛範後王茂

則布令審端咸必由之朕肅辰巖廊思引風訓深務八  
政永鑒在勤靜言日昃無忘寢興守宰親民之主牧伯  
調俗之司宜嚴課農桑罔令游惰揆景肆力必窮地利  
固修堤防考校殿最若耕蠶殊衆具以名聞游怠害業  
卽便列奏主者詳爲條格乙未虜攻鍾離徐州刺史蕭  
惠休破之丙申加太尉陳顯達使持節都督西北征討  
諸軍事丁酉內外纂嚴三月戊申詔南徐州僑舊民丁  
多克戎旅蠲今年三課己未司州刺史蕭誕與衆軍擊  
虜破之詔雍豫司南兗徐五州遇寇之家悉停今年稅  
調其與虜交通不問往罪丙寅停青州麥租虜自壽春

退走甲申解嚴夏四月己亥朔三百里內獄訟同集京師克日聽覽此以外委州郡訊察三署徒隸原遣有差索虜圍漢中梁州刺史蕭懿拒退之己未以新除黃門郎裴叔業爲徐州刺史五月甲午寢廟成詔監作長帥可賜位一等役身遣假一年非役者蠲租同假限六月壬戌誅領軍將軍蕭諶西陽王子明南海王子罕邵陵王子貞乙丑以右衛將軍蕭坦之爲領軍將軍秋七月辛未以右將軍晉安王寶義爲南徐州刺史壬申以冠軍將軍梁王爲司州刺史辛卯以氏楊馥之爲北秦州刺史仇池公八月丁未以右衛將軍廬陵王寶源爲南

兗州刺史庚戌以新除輔國將軍申希祖爲兗州刺史九月己丑改封南平王寶攸爲邵陵王蜀郡王子文爲西陽王廣漢王子峻爲衡陽王臨海王昭秀爲巴陵王永嘉王昭粲爲桂陽王冬十月丁卯詔曰軌世去奢事殷哲后訓物以儉理鏡前王朕屬流弊之末襲澆浮之季雖恭己弘化刻意隆平而禮讓未興侈華猶競永覽玄風兢言集愧思所以還淳改俗復古移民可罷東田毀興光樓并詔水衡量省御乘乙卯納皇太子妃褚氏大赦王公已下班賜各有差斷四方上禮十二月丁酉詔曰舊國都邑望之悵然況乃自經南面負展宸居或

功濟當時德覃一世而塋壠攢穢封樹不修豈直嗟深  
牧豎悲甚信陵而已哉昔中京淪覆鼎玉東遷晉元締  
構之始簡文遺詠在民而松門夷替珽路榛蕪雖年代  
殊往撫事興懷晉帝諸陵悉加修理并增守衛吳晉陵  
二郡失稔之鄉蠲三調有差

三年春正月丁酉以陰平王楊昺子崇祖爲沙州刺史  
封陰平王北中郎將建安王寶寅爲江州刺史己巳詔  
申明守長六周之制乙酉詔去歲索虜寇邊緣邊諸州  
郡將士有臨陣及疾病死亡者竝送還本土三月壬午  
詔車府乘輿有金銀飾校者皆剔除夏四月虜寇司州

戍兵擊破之五月己巳以征虜將軍蕭懿爲益州刺史  
前軍將軍陰廣宗爲梁南秦二州刺史前新除寧州刺  
史李慶宗爲寧州刺史秋九月辛酉以冠軍將軍徐玄  
慶爲兗州刺史冬十月以輔國將軍申希祖爲司州刺  
史閏十二月戊寅皇太子冠賜王公以下帛各有差爲  
父後者賜爵一級斷遠近上禮又詔今歲不須光新可  
以見錢爲百官供給

四年春正月庚午大赦詔曰嘉肴停俎定方旨於必甘  
良玉在攻表瑋璋於旣就是以陶鈞萬品務本爲先經  
緯九區學敷爲大往因時康崇建庠序屯虞荐有權從

省廢謳誦寂寥倏移年稔永言古昔無忘盱吳今華夏  
又安要荒慕嚮締修東序實允適時便可式依舊章廣  
延國胄弘敷景業光被後昆壬寅詔民產子者蠲其父  
母調役一年又賜米十斛新婚者蠲夫役一年丙辰尙  
書令王晏伏誅二月甲子以左僕射徐孝嗣爲尙書令  
征虜將軍蕭季敞爲廣州刺史三月乙未右僕射沈文  
季領護軍將軍秋八月追尊景皇所生王氏爲恭太后  
索虜寇沔北冬十月又寇司州甲戌遣太子中庶子梁  
王右軍司馬張稷討之十一月丙辰以氏楊靈珍爲北  
秦州刺史仇池公武都王丁亥詔所在結課屋宅田桑

可詳減舊價十二月甲子以冠軍將軍裴叔業爲豫州  
刺史冠軍將軍徐玄慶爲徐州刺史寧朔將軍左興盛  
爲兗州刺史丁丑遣度支尙書崔慧景率衆救雍州  
永泰元年春正月癸未朔大赦逋租宿債在四年之前  
皆悉原除中軍大將軍徐孝嗣卽本號開府儀同三司  
沔北諸郡爲虜所侵相繼敗沒乙巳遣太尉陳顯達持  
節救雍州丁未誅河東王鉉臨賀王子岳西陽王子文  
衡陽王子峻南康王子琳永陽王子珉湘東王子建南  
郡王子夏桂陽王昭粲巴陵王昭秀二月癸丑遣左衛  
將軍蕭惠休假節援壽陽辛未豫州刺史裴叔業擊虜

於淮北破之辛巳平西將軍蕭遙欣領雍州刺史三月  
丙午蜀雍州遇虜之縣租布戍申詔曰仲尼明聖在躬  
允光上哲弘厥雅道大訓生民師範百王軌儀千載立  
人斯仰忠孝攸出玄功潛被至德彌闡雖反袂遐曠而  
祧薦靡闕時祭舊品秩比諸侯頃歲以來祀典陵替俎  
豆寂寥牲奠莫舉豈所以克昭盛烈永隆風教者哉可  
式循舊典詳復祭秩使牢餼備禮欽饗兼申夏四月甲  
寅改元赦三署囚繫原除各有差文武賜位二等丙戌  
以鎮軍將軍蕭坦之爲侍中中領軍己未立武陵昭王  
子子坦爲衡陽王丙寅以西中郎長史劉暄爲郢州刺

史丁卯大司馬會稽太守王敬則舉兵反五月壬午遣  
輔國將軍劉山陽率軍東討乙酉斬敬則傳首曲赦浙  
東吳晉陵七郡以後軍長史蕭穎胄爲南兖州刺史丁  
酉以北中郎將司馬元和爲兖州刺史秋七月以輔國  
將軍王珍國爲青冀一州刺史癸卯以太子中庶子梁  
王爲雍州刺史太尉陳顯達爲江州刺史己酉帝崩正  
福殿年四十七遺詔曰徐令可重申八命中書監本官  
悉如故沈文季可左僕射常侍護軍如故江祏可右僕  
射江祀可侍中劉暄可衛尉軍政大事委陳太尉內外  
衆事無大小委徐孝嗣遙光坦之江祏其大事與沈文

季江祀劉暄參懷心膂之任可委劉俊蕭惠休崔惠景  
葬興安陵帝明審有吏才持法無所借制御親幸臣下  
肅清驅使寒人不得用四幅織大存儉約罷世祖所起  
新林苑以地還百姓廢文帝所起太子東田斥賣之永  
明中輿輦舟乘悉別取金銀還主衣庫太官進御食有  
裹蒸帝曰我食此不盡可四片破之餘克晚食而世祖  
掖庭中宮殿服御一無所改性猜忌多慮故亟行誅戮  
潛信道術用計數出行幸先占利害南出則唱云西行  
東遊則唱云北幸簡於出入竟不南郊上初有疾無輟  
聽覽祕而不傳及寢疾甚久勅臺省府署文簿求白魚  
以爲治外始知之身衣絳衣服飾皆赤以爲厭勝巫覡  
云後湖水頭經過宮內致帝有疾帝乃自至太官行水  
溝左右啓太官若無此水則不立帝決意塞之欲南引  
淮流會崩事寢

史臣曰高宗以支庶纂歷據猶子而爲論一朝到此誠  
非素心遺寄所當諒不獲免夫戕夷之事懷抱多端或  
出自雄忍或生乎畏懾令同財之親在我而先棄進引  
之愛量物其必遠疑怯旣深猜似外入流涕行誅非云  
義舉事苟求安能無內愧旣而自樹本根枝胤孤弱貽  
厥不昌終覆宗社若令壓鈕之徵必委天命盤庚之祀

亦繼陽甲杖運推公夫何譏爾  
贊曰高宗傍起宗國之慶慕名儉德垂文法令兢兢小心察察吏政沔陽失土南風不競

南齊書卷六

南齊書卷六考證

明帝本紀三年春正月丁酉○通鑑考異曰案長歷是月乙丑朔無丁酉下有己巳當作丁卯

四年春正月庚午○通鑑考異曰案長歷是月己丑朔無庚午通鑑所以不日

永泰元年七月以太尉陳顯達為江州刺史○臣祖庚

按陳顯達傳顯達敗于馬圈表解職不許求降號又不許乃除江州又云東昏立顯達彌不樂還京師得此授甚喜据此則刺史江州在東昏立後馬圈之敗亦在永元元年情事適合况明帝末顯達方以三公



三月戊子立皇后褚氏賜王公以下錢各有差  
永元元年春正月戊寅大赦改元詔研策秀才考課百  
司辛卯車駕祀南郊詔三品清資官以上應食祿者有  
二親或祖父母年登七十並給見錢癸卯以冠軍將軍  
南康王寶融爲荊州刺史三月癸丑以北中郎將邵陵  
王寶攸爲南兗州刺史是月太尉陳顯達敗績於馬圈  
夏四月己巳立皇太子誦大赦賜民爲父後爵一級甲  
戌以寧朔將軍柳惔爲梁南秦二州刺史五月癸亥以  
撫軍大將軍始安王遙光爲開府儀同三司六月己酉  
新除右衛將軍崔惠景爲護軍將軍癸亥以始興內史

范雲爲廣州刺史甲子詔原雍州今年三調秋七月丁  
亥京師大水死者衆詔賜死者材器并賑卹八月乙巳  
蠲京邑遇水資財漂蕩者今年調稅又詔爲馬圈戰亡  
將士舉哀丙午揚州刺史始安王遙光據東府反詔曲  
赦京邑中外戒嚴尙書令徐孝嗣以下屯衛宮城遣領  
軍將軍蕭坦之率六軍討之戊午斬遙光傳首己未以  
征北大將軍晉安王寶玄爲南徐兗二州刺史己巳尙  
書令徐孝嗣爲司空右衛將軍劉暄爲領軍將軍閏月  
丙子以江陵公寶覽爲始安王虜僞東徐州刺史沈陵  
降以爲北徐州刺史九月丁未以輔國將軍裴叔業爲

兗州刺史征虜長史張沖爲豫州刺史壬戌以顛誅大臣大赦天下辛未以太子詹事王瑩爲中領軍冬十月乙未誅尚書令新除司空徐孝嗣右僕射新除鎮軍將軍沈文季乙巳以始興內史顏翻爲廣州刺史征虜將軍沈陵爲越州刺史十一月丙辰太尉江州刺史陳顯達舉兵於尋陽乙丑護軍將軍崔慧景加平南將軍督衆軍南討事丙寅以冠軍將軍王鴻爲徐州刺史十二月癸未以前輔國將軍楊集始爲秦州刺史甲申陳顯達至京師宮城嚴警六軍固守乙酉斬陳顯達傳首丁亥以征虜將軍邵陵王寶攸爲江州刺史

二年春正月壬子以輔國將軍張沖爲南兗州刺史庚午詔討豫州刺史裴叔業二月癸未以黃門郎蕭寅爲司州刺史丙戌以衛尉蕭懿爲豫州刺史征壽春己丑裴叔業病死兄子植以壽春降虜三月癸卯以輔國將軍張沖爲司州刺史乙卯遣平西將軍崔慧景率衆軍伐壽春夏四月丁未以新除冠軍將軍張沖爲南兗州刺史崔慧景於廣陵舉兵襲京師壬子右衛將軍左興盛督京邑水步衆軍南徐州刺史江夏王寶玄以京城納慧景乙卯遣中領軍王瑩率衆軍屯北籬門壬戌慧景至瑩等敗績甲子慧景入京師宮內據城拒守豫州

刺史蕭懿起義救援癸酉慧景棄衆走斬首詔曲赦京  
邑南徐兗二州乙亥以新除尙書右僕射蕭懿爲尙書  
令丙子以晉熙王寶嵩爲南徐州刺史五月乙巳以虜  
僞豫州刺史王肅爲豫州刺史戊申以桂陽王寶貞爲  
中護軍巳酉江夏王寶玄伏誅壬子大赦乙丑曲赦京  
邑南徐兗二州戊辰以始安王寶覽爲湘州刺史六月  
庚寅車駕於樂遊苑內會如三元京邑女人放觀戊戌  
以新除冠軍將軍張沖爲郢州刺史守五兵尙書陸慧  
曉爲南兗州刺史秋七月甲辰以驃騎司馬張穆爲北  
徐州刺史八月丁酉以新除驃騎司馬陳伯之爲豫州

刺史甲申夜宮內火冬十月巳卯害尙書令蕭懿十一  
月辛丑以寧朔將軍張穆爲南兗州刺史甲寅西中郎  
長史蕭穎胄起義兵於荊州十二月雍州刺史梁王起  
義兵於襄陽戊寅以冠軍長史劉繪爲雍州刺史

三年春正月丙申朔合朔時加寅漏上八刻事畢宮人  
於闕武堂元會皇后正位闈人行儀帝戎服臨視丁酉  
以驃騎大將軍晉安王寶義爲司徒新除撫軍將軍建  
安王寶寅爲車騎將軍開府儀同三司甲辰以寧朔將  
軍王珍國爲北徐州刺史辛亥車駕祀南郊詔大赦天  
下百官陳讜言二月丙寅乾和殿西廂火壬午詔遣羽

林兵征雍州中外纂嚴乙酉以武烈將軍胡元進爲廣州刺史三月己亥以驃騎將軍沈徽孚爲廣州刺史甲辰以輔國將軍張欣泰爲雍州刺史丁未南康王寶融卽皇帝位於江陵癸丑遣平西將軍陳伯之西征六月京邑雨水遣中書舍人二縣官長賑賜有差蕭穎胄弟穎孚起兵廬陵戊子曲赦江州安成廬陵二郡秋七月癸巳曲赦荆雍二州甲午雍州刺史張欣泰前南譙太守王靈秀率石頭文武奉建安王寶寅向臺至杜姥宅宮門閉乃散走己未以征虜長史程茂爲郢州刺史驍騎將軍薛元嗣爲雍州刺史是日元嗣以郢州降義師八月丁卯以輔國將軍申胄監豫州事辛巳光祿大夫張環鎮石頭辛未以太子左率李居士總督西討諸軍事屯新亭城九月甲辰以居士爲江州刺史新除冠軍將軍王珍國爲雍州刺史車騎將軍建安王寶寅爲荊州刺史以輔國將軍申胄監郢州龍驤將軍馬仙琕監豫州驍騎將軍徐元稱監徐州是日義軍至南州申胄軍二萬人於姑熟奔歸戊申以後軍參軍蕭瑋爲司州刺史前輔國將軍魯休烈爲益州刺史輔國長史趙越嘗爲梁南秦二州刺史丙辰李居士與義軍戰於新亭敗績冬十月甲戌王珍國與義軍戰於朱雀桁敗績戊

寅寧朔將軍徐元瑜以東府城降青冀二州刺史桓和入衛屯東宮巳卯衆降光祿大夫張瓌棄石頭還宮於是閉宮城門自守庚辰以驍騎將軍胡虎牙爲徐州刺史左軍將軍徐智勇爲益州刺史游擊將軍牛平爲梁南秦二州刺史李居士以新亭降琅邪城主張木亦降義師築長圍守宮城十二月丙寅新除雍州刺史王珍國侍中張穰率兵入殿廢帝時年十九帝在東宮便好弄不喜書學高宗亦不以爲非但勗以家人之行令太子求一日再入朝發詔不許使三日一朝嘗夜捕鼠達旦以爲笑樂高宗臨崩屬以後事以隆昌爲戒曰作事

不可在人後故委任羣小誅諸宰臣無不如意性重澀少言不與朝士接唯親信閹人及左右御刀應敕等自江祏始安王遙光誅後漸便騎馬日夜於後堂戲馬與親近閹人倡伎鼓叫常以五更就臥至晡乃起王侯節朔朝見晡後方前或際閹遣出臺閣案奏月數十日乃報或不知所在二年元會食後方出朝賀裁竟便還殿西序寢自已至申百僚陪位皆僵仆菜色比起就會忽遽而罷陳顯達事平漸出遊走所經道路屏逐居民從萬春門由東宮以東至于郊外數十里皆空家盡室巷陌懸幔爲高障置伎人防守謂之屏除或於市肆左

側過親幸家環回宛轉周逼京邑每三四更中鼓聲四出幡戟橫路百姓喧走相隨士庶莫辨出輒不言定所東西南北無處不驅人高障之內設部伍羽儀復有數部皆奏鼓吹羌胡伎鼓角橫吹夜出晝反火光照天拜愛姬潘氏爲貴妃乘臥輿帝騎馬從後著織成袴褶金薄帽執七寶縛稍戎服急裝不變寒暑陵冒雨雪不避坑穿馳騁渴乏輒下馬解取腰邊蠶器酌水飲之復上馬馳去馬乘具用錦繡處患爲雨所沾濕織雜珠爲覆蒙備諸雕巧教黃門五六十人爲騎客又選無賴小人善走者爲逐馬左右五百人常以自隨奔走往來畧

不暇息置射雉場二百九十六處翳中帷帳及步鄣皆裕以綠紅錦金銀鏤弩牙瑇瑁帖箭郊郭四民皆廢業樵蘇路斷吉凶失時乳婦婚姻之家移產寄室或輿病弃屍不得殯葬有弃病人於青溪邊者吏懼爲監司所問推置水中泥覆其面須臾便死遂失骸骨後宮遭火之後更起仙華神仙玉壽諸殿刻畫雕綵青葢金口帶麝香塗壁錦幔珠簾窮極綺麗繫役工匠自夜達曉猶不副速乃剔取諸寺佛刹殿藻井仙人騎獸以克足之世祖興光樓上施青漆世謂之青樓帝曰武帝不巧何不純用瑠璃潘氏服御極選珍寶主衣庫舊物不復周

用貴市民間金銀寶物價皆數倍虎魄釧一隻直百七十萬京邑酒租皆折使輸金以爲金塗猶不能足下揚南徐二州橋桁塘埭丁計功爲直歛取見錢供太樂主衣雜費由是所在塘瀆多有隳廢又訂出雉頭鶴氅白鷺縑親幸小人因緣爲姦利課一輸十郡縣無敢言者三年夏於閔武堂起芳樂苑山石皆塗以五采跨池水立紫閣諸樓觀壁上畫男女私褻之像種好樹美竹天時盛暑未及經日便就萎枯於是徵求民家望樹便取毀撤牆屋以移致之朝栽暮拔道路相繼花藥雜草亦復皆然又於苑中立市太官每旦進酒肉雜肴使宮人

屠酤潘氏爲市令帝爲市魁執罰爭者就潘氏決判帝有膂力能擔白虎幢自製雜色錦伎衣綴以金花玉鏡衆寶逞諸意態所寵羣小黨與三十一人黃門十人初任新蔡人徐世檨爲直閣驍騎將軍凡有殺戮皆其用命殺徐孝嗣後封爲臨汝縣子陳顯達事起加輔國將軍雖用護軍崔慧景爲都督而兵權實在世檨及事平世檨謂人曰五百人軍主能平萬人都督世檨亦知帝昏縱密謂其黨茹法珍梅蟲兒曰何世天子無要人但阿儂貨主惡耳法珍等爭權以白帝帝稍惡其凶強以二年正月遣禁兵殺之世檨拒戰而死自是法珍蟲兒

用事竝爲外監口稱詔敕中書舍人王咺之與相脣齒  
專掌文翰其餘二十餘人皆有勢力崔慧景平後法珍  
封餘干縣男蟲兒封竟陵縣男及義師起江郢二鎮已  
降帝遊騁如舊謂茹法珍曰須來至白門前當一決義  
師至近郊乃聚兵爲固守之計召王侯朝貴分置尙書  
都座及殿省又信鬼神崔慧景事時拜蔣子文神爲假  
黃鉞使持節相國太宰大將軍錄尙書揚州牧鍾山王  
至是又尊爲皇帝迎神像及諸廟雜神皆入後堂使所  
親巫朱光尙禱祀祈福以冠軍將軍王珍國領三萬人  
據大桁莫有鬪志遣左右直長闡豎王寶孫督戰呼爲  
王長子寶孫切罵諸將帥直閣將軍席豪發憤突陣死  
豪驍將旣弊衆軍於是土崩軍人從朱雀觀上自投及  
赴淮死者無數於是閉城自守城內軍事委王珍國兗  
州刺史張穆入衛京師以穆爲副實甲猶七萬人帝烏  
帽袴褶備羽儀登南掖門臨望又虛設鎧馬齋仗千人  
皆張弓拔白出東掖門稱蔣王出盪素好鬪軍隊初使  
宮人爲軍後乃用黃門親自臨陳詐被劊使人輿將去  
至是於闕武堂設牙門軍頓每夜嚴警帝於殿內騎馬  
從鳳莊門入徽明門馬被銀蓮葉具裝鎧雜羽孔翠寄  
生逐馬左右衛從晝眠夜起如平常聞外鼓叫聲被大

紅袍登景陽樓屋上望弩幾中之衆皆怠怨不爲致力  
募兵出戰出城門數十步皆坐甲而歸慮城外有伏兵  
乃燒城傍諸府署六門之內皆蕩盡城中閣道西掖門  
內相聚爲市販死牛馬肉帝初與羣小計議陳顯達一  
戰便敗崔慧景圍城退走謂義師遠來不過旬日亦應  
散去敕太官辦樵米爲百日糧而已大桁敗後衆情究  
懼法珍等恐人衆驚走故閉城不復出軍旣而義師長  
圍旣立塹柵嚴固然後出盪屢戰不捷帝尤惜金錢不  
肯賞賜法珍叩頭請之帝曰賊來獨取我邪何爲就我  
求物後堂儲數百具榜啓爲城防帝云擬作殿竟不與  
又催御府細作三百人精仗待圍解以擬屏除金銀雕  
鏤雜物倍急於常王珍國張穆懼禍及率兵入殿分軍  
又從西上閣入後宮斷之御刀豐勇之爲內應是夜帝  
在含德殿吹笙歌作女兒子臥未熟聞兵入趨出北戶  
欲還後宮清曜閣已閉闔人禁防黃泰平以刀傷其膝  
仆地顧曰奴反邪直後張齊斬首送梁王宣德太后令  
曰皇室受終祖宗齊聖太祖高皇帝肇基駿命膺錄受  
圖世祖武皇帝係明下武高宗明皇帝重隆景業咸降  
年不永宮車早晏皇祚之重允屬儲元而稟質凶愚發  
於稚齒爰自保姆迄至成童忍戾昏頑觸途必著高宗

留心正嫡立嫡惟長輔以羣才閒以賢戚內外維持冀  
免多難未及期稔便逞屠戮密戚近親元勳良輔覆族  
殲門旬月相係凡所任杖盡慝窮奸皆營伍屠販容狀  
險醜身秉朝權手斷國命誅戮無辜納其財產睚眦之  
間屠覆比屋身居元首好是賤事危冠短服坐臥以之  
晨出夜反無復已極驅斥氓庶巷無居人老細奔遑寘  
身無所東邁西屏北出南驅負疾輿屍填街塞陌興築  
繕造日夜不窮晨構夕毀朝穿暮塞絡以隨珠方斯已  
陋飾以璧璫曾何足道時暑赫曦流金鑠石移竹藝果  
匪日伊夜根未及植葉已先枯畚鍤紛紜勤倦無已散

費國儲專事浮飾逼奪民財自近及遠兆庶恇恇流竄  
道路府帑旣竭肆奪市道工商裨販行號道泣屈此萬  
乘躬事角抵昂首翹肩逞能槿木觀者如堵曾無忤容  
芳樂華林竝立闐闐踞肆鼓刀手銓輕重干戈鼓操昏  
曉靡息無戎而城豈足云譬至於居喪淫讌之愆三年  
載弄之醜反道違常之豐牝鷄晨鳴之慝於事已細故  
可得而畧也罄楚越之竹未足以言校辛癸之君豈或  
能匹征東將軍忠武奮發投袂萬里光奉明聖翌成中  
興乘勝席卷掃清京邑而羣小靡識嬰城自固緩戮稽  
誅倏彌旬月宜速勦定寧我邦家可潛遣閒介密宣此

南齊書卷七  
旨忠勇齊奮過加蕩撲放斥昏凶衛送外第未亡人不  
幸驟此百罹感念存沒心焉如割柰何柰何又令依漢  
海昏侯故事追封東昏侯茹法珍梅蟲兒王咺之等伏  
誅豐勇之原死

史臣曰漢宣帝時南郡獲白虎獲之者張武言武張而  
猛服也東昏侯亡德橫流道歸拯亂躬當翦戮實啓太  
平推闡監之名字亦天意也

贊曰東昏慢道匹癸方辛乃隳典則乃弃彝倫玩習兵  
火終用焚身

南齊書卷七

南齊書卷七考證

東昏侯本紀永元元年二月太尉陳顯達敗績於馬圈

○ 臣宗萬

按杜佑曰馬圈城去襄陽三百里在今南

陽郡界柰縣北又曰後魏馬圈鎮漢涅陽縣地

二年四月乙卯遣中領軍王瑩率衆軍屯北籬門○ 臣

祖庚

按崔慧景傳帝遣右衛將軍左興盛率臺內三

萬人拒慧景於北籬門與紀異

十二月梁王起義兵於襄陽○ 臣祖庚 按通鑑云十一

月乙巳衍集僚佐謂曰當與卿等共除之是日建牙  
集衆又云帝遣劉山陽將兵就蕭穎胄襲襄陽然則

是時梁王尚未起義矣故考異曰齊紀誤也

以武烈將軍胡元進為廣州刺史○武烈諸本皆作威

烈臣承蒼按宋百官志有武烈將軍無威烈將軍齊

世官名多循宋制今定作武

三年三月丁未南康王寶融即皇帝位○臣祖庚按和

帝紀三年正月乙巳王受命大赦據此則正月乙巳

南康王已即位江陵矣此云三月丁未者通鑑考異

曰蓋是日建康始聞之耳

南齊書卷七考證

南齊書卷八

梁 蕭 子 顯 撰

本紀第八

和帝

和帝諱寶融字智昭高宗第八子也建武元年封隨郡  
王邑二千戶三年為冠軍將軍領石頭戍軍事永元元  
年改封南康王為持節督荆雍益寧梁南北秦七州軍  
事西中郎將荊州刺史二年十一月甲寅長史蕭穎胄  
殺輔國將軍巴西梓潼二郡太守劉山陽奉梁王舉義  
乙卯教纂嚴又教曰吾躬率晉陽翦此凶孽戎事方勤

宜覃澤惠所領內繫囚見徒罪無輕重殊死已下皆原  
遣先有位署卽復本職將吏轉一階從征身有家口停  
鎮給廩食凡諸雜役見在諸軍帶甲之身克定之後悉  
免爲民其功效賞報別有科條丙辰以雍州刺史梁王  
爲使持節都督前鋒諸軍事左將軍丁巳以蕭穎胄爲  
右將軍都督行留諸軍事戊午梁王上表勸進十二月  
乙亥羣僚勸進竝不許壬辰驍騎將軍夏侯亶自京師  
至江陵稱宣德太后令西中郎將南康王宜纂承皇祚  
光臨億兆方俟清宮未卽大號可且封宣城南琅邪南  
東海東陽臨海新安尋陽南郡竟陵宜都十郡爲宣城

王相國荊州牧加黃鉞置僚屬選百官西中郎府南康  
國竝如故須軍次近路主者詳依舊典法駕奉迎三年  
正月乙巳王受命大赦唯梅蟲兒茹法珍等不在赦例  
右將軍蕭穎胄爲左長史進號鎮軍將軍梁王進號征  
東將軍甲戌以冠軍將軍楊公則爲湘州刺史甲寅建  
牙于城南二月乙丑以冠軍長史王茂先爲江州刺史  
冠軍將軍曹景宗爲郢州刺史右將軍邵陵王寶攸爲  
荊州刺史己巳羣僚上尊號立宗廟及南北郊甲申梁  
王率大衆屯沔口郢州刺史張沖拒守三月丁酉張沖  
死驃騎將軍薛元嗣等固城

中興元年春三月乙巳卽皇帝位大赦改元文武賜位  
二等鰥寡孤獨不能自存者穀人五斛卽永元三年也  
以相國左長史蕭穎胄爲尙書令晉安王寶義爲司空  
廬陵王寶源爲車騎將軍開府儀同三司建安王寶寅  
爲徐州刺史散騎常侍夏侯詳爲中領軍領軍將軍蕭  
偉爲雍州刺史丙午有司奏封庶人寶卷爲零陽侯詔  
不許又奏爲涪陵王詔可乙酉尙書令蕭穎胄行荊州  
刺史假梁王黃鉞王子以征虜將軍柳惔爲益寧二州  
刺史已未以冠軍將軍莊丘黑爲梁南秦二州刺史冠  
軍將軍鄧元起爲廣州刺史夏四月戊辰詔曰荆雍義

舉所基實始王迹君子勞心細人盡力宜加酬獎副其  
乃誠凡東討衆軍及諸嚮義之衆可普復除五月乙卯  
車駕幸竹林寺禪房宴羣臣巴西太守魯休烈巴東太  
守蕭惠訓子瓚拒義軍秋七月東軍主吳子陽十三軍  
救郢州屯加湖丁酉征虜將軍王茂先擊破之辛亥以  
茂先爲中護軍丁卯魯山城主孫樂祖以城降己未郢  
城主薛元嗣降八月丙子平西將軍陳伯之降乙卯以  
伯之爲江州刺史子虎牙爲徐州刺史九月乙未詔梁  
王若定京邑得以便宜從事冬十一月乙未以輔國將  
軍李元履爲豫州刺史壬寅尙書令鎮軍將軍蕭穎胄

卒以黃門郎蕭澹行荊州府州事丁巳蕭瓚魯休烈降  
十二月丙寅建康城平巳巳皇太后令以梁王爲大司  
馬錄尚書事驃騎大將軍揚州刺史封建安郡公依晉  
武陵王遵承制故事百僚致敬壬申改封建安王寶寅  
鄱陽王癸酉以司徒揚州刺史晉安王寶義爲太尉領  
司徒甲戌給大司馬錢二千萬布絹各五千匹乙酉以  
輔國將軍蕭宏爲中護軍

二年春正月戊戌宣德太后臨朝入居內殿大司馬梁  
王解承制致敬如先巳亥以寧朔將軍蕭昺監南兗州  
壬寅以大司馬都督中外諸軍事加殊禮巳酉以大司

馬長史王亮爲守尚書令甲寅詔大司馬梁王進位相  
國總百揆揚州牧封十郡爲梁公備九錫之禮加遠遊  
冠位在諸王上加相國綠綬綬巳未以新除右將軍曹  
景宗爲郢州刺史二月壬戌湘東王寶暉伏誅戊辰詔  
進梁公爵爲梁王增封十郡三月乙未皇太后令給梁  
國錢五百萬布五千匹絹千匹辛丑鄱陽王寶寅奔虜  
邵陵王寶攸晉熙王寶嵩桂陽王寶貞伏誅甲午命梁  
王冕十有二旒建天子旌旗出警入蹕乘金根駕六馬  
備五時副車置旄頭雲罕樂舞八佾設鍾簋宮懸王子  
王女爵命一如舊儀庚戌以冠軍長史蕭秀爲南徐州

刺史新除中領軍蔡道恭爲司州刺史車駕東歸至姑  
熟丙辰禪位梁王丁巳廬陵王寶源薨夏四月辛酉禪  
詔至皇太后遜外宮丁卯梁王奉帝爲巴陵王宮于姑  
熟行齊正朔一如故事戊辰薨年十五追尊爲齊和帝  
葬恭安陵

史臣曰夏以桀亡殷隨紂滅郊天改朔理無延世而皇  
符所集重興西楚神器甃來雖有冥數徽名大號斯爲  
幸矣

贊曰和帝晚隆掃難清宮達機覩運高頌永終  
南齊書卷八

南齊書卷八考證

和帝本紀有司奏封庶人寶卷爲零陽侯○零陽南史  
作零陵

中興二年二月壬戌湘東王寶暉伏誅○臣祖庚按明

帝十一男湘東無傳南史王亮傳云張稷等議立湘  
東嗣王寶暉領軍王瑩曰城閉已久人情離解征東  
在近何不諮問紀不載其事通鑑考異云和帝已立  
稷等知建康不可守故弒東昏豈敢復議立寶暉據  
此則議立湘東之說南史誤矣是時行已有異志諸  
王無不見害湘東獨能自存乎

則王... 不... 良... 善... 則... 東... 國... 並... 南... 齊... 平... 則... 史... 東... 歸... 主... 統...  
 北... 隕... 難... 立... 時... 來... 以... 德... 海... 吳... 越... 矣... 長... 權... 帝... 日... 齊... 異... 志... 節...  
 變... 善... 味... 其... 裏... 不... 可... 行... 海... 東... 有... 並... 東... 齊... 立... 實... 強... 壯...  
 亦... 故... 師... 祠... 禱... 師... 禱... 禱... 其... 事... 每... 並... 家... 吳... 云... 味... 帝... 日... 立...  
 東... 國... 王... 賢... 孫... 所... 軍... 王... 日... 姓... 日... 入... 人... 部... 謝... 孫... 孫... 東...  
 帝... 十... 年... 吳... 成... 東... 魏... 禱... 禱... 禱... 史... 王... 長... 神... 之... 憑... 靈... 著... 靈... 立... 廟...  
 甲... 興... 二... 年... 二... 月... 日... 吳... 臨... 東... 王... 寶... 運... 分... 封... ○... 日... 有... 東... 齊... 即...  
 并... 零... 刻...

南齊書卷八考證

